



# आँखी

(दोयुम छाप)

पृथ्वी नाथ कौल 'सायिल'

Gandhi Memorial College Of Education Bantalab Jammu



# आँही

(दोयुम छाप)

पृथ्वी नाथ कौल 'सायिल'

ॐ नमो भगवते गोपी नाथाय

येमि संजि कृपायि असम्भव सम्भव छु सपदाने ।

तस ग्वरु दीवस छुस बु पादन प्यवान ।।

प्रकाशक

पृथ्वीन एण्ड सन्ज

दिल्ली/जम्मू

नैव दिल

‘शारिका पीठ’

19-ए-महावीर जैन मार्ग  
लक्ष्मी विहार, ककरोला मोड  
उत्तम नगर, दिल्ली-59  
मो.न०- 09811334903

जोम

“शारिका आंगन”

138/4/4, शारिका विहार  
लोवर रूप नगर, जम्मू  
फोन - 0191-2591774  
मो.न० -09086635515



प्रैखटिनय पॅज नीर्यनय,  
गछ म्यॉन्य् ओही पूशिनय ।  
म्यॉन्य् रुम रुम छिय यछान,  
गछ जिंदगॉनी पूशिनय ।।

ओही

ओहियय ओहियि

(दोयुम छाप)

पृथ्वी नाथ कौल

(सायिल)

छापन सन् 2011

म्वल: 100 र्वपयि सिर्फ

(सॉरी अधिकार लेखुकु सुंदि नावु मॅहफूज़)

## कॉशुर पॅरिव लीखिव यिथु पॉठ्य

कॉशिर्य अछर :- क,ख,ग,च,छ,ज,झ,ट,ठ,ड,त,थ, द, न, प,फ,ब,म  
य,र,ल,व,श,स,ह,क्ष,त्र,ज्ञ ।

कॉशिर्य स्वर :- अ,आ,अँ,ऑ,इ,ई,अु,अु,उ,ऊ,अं,ए, ऐ, ओ, औ,व्व,य

स्वर	मात्रा	वरताव
अ	मूल स्वर	अख (एक), अज (आज), मस (बाल),बर,(द्वार),कन (कान),पर (पढ़ो),
आ	।	आश (आशा), आव (आया), सास (हजार), नाव(नाम), माम (मामा)दान (चूल्हा)
अँ	ॐ	अँछ (आंख),गॅर (घड़ी), चॅर (चिडिया),मॅछ (मक्खी)बॅड (बडी),नॅर (भुजा)
ऑ	।	ऑल (इलायची),ऑठ (आठ), मॉज (माता),दॉन (अनार) मॉश (भैंस),लॉर( खीरा)
इ	ि	यिं (यह),यिम (ये),छि (हैं),जिठ ( बडी) ति (और,भी) यिछ (ऐसी)छिठ (छींठ)
ई	ी	ईद (ईद),शीन (बर्फ),सीर (ईंट),टीन (पीपा),तील (तेल)मीच (नाप) रीथ (रीति)
अु	ॐ	चु (तुम),बु (मैं),तु (और),सुच (दर्जी) रुख (रेखा), टुख (दौड) कुन (नीव)जु (दो)
अु	ॐ	जुज (दौ दौ),चुन (चूरा),तुर (सर्दी), कुर(क्रूर), कमथ (मूल्य) तुंछ (कान की बाली)सुत्य (साथ)
उ	ॐ	हु (वह) सु (हु),छु (है),कुल(पेड),वुठ (होंठ),गुर (घोडा)कुठ (कमरा)फुट (फुट,टूटा)
ऊ	ॐ	नून (नमक),कूर (कन्या),नूल (नेवला), गूर (ग्वाला),चूर (चोर) दून (धुनिया)कूट ( खम्बा)
ए	ॐ	= चेर (देर),हेर (सीढ़ी),जेठ (ज्येष्ठ)तेल, (तिल),चेन (महसूस)चेर (खूबानी)पेछ (पेचिस)
ऐ	ॐ	त्रे (तीन), शे (छः),मे (मुझे),चे (तुमको), बेनि (बहन) वेठ (मोटी)बेयि (दुबारा)खेयि ( खायेगा,खायेगी)



ओ	ो	ओल (घोंसला), मोल (पिता), चोर (चार), बोर (बिल्ला) कोन (काना) सोन (हमारा), टोठ (प्यारा) लोव (नर्म)
ओ	ो	होट (गल्ला), वोछ (बछडा), होस (हाथी), कोठ (घुटना) मोट (मोटा) तोन (पतला) दोल ( आँचल)
व्व	व	व्वठ (छलांग ), द्वद (दूध ), व्वद (बुधि), म्वल (मूल्य) क्वल (नहर, कुल) स्वख (सुख) प्वफ (पोफी) द्वस (दीवार) ग्वर (गुरु)
य-	य-	द्यान (ध्यान) द्यल (छिलका) ब्याख (दूसरा) ब्योल (बीज) म्योन (मेरा) ग्यव (घी), छ्यठ (झूठन) प्यंद (गेंद)
-य	च	म्याँन्य (मेरी), चँल्य (भागे), वॉर्य (बारी) फेर्य (कतरे) हँल्य (टेढ़े), नॉल्य (नाली), कँन्य (पत्थर) नँट्य (गढे)
अं	-	दंद (दांत) मंज (में) स्यंद (सिंधु) वांदुर (वानर) वंद (जाडा) दांद (बैल) कंज (ओखल)
र	/	ग्रख (उबाल) क्रख (चीख), ग्रंद (गिनती), ग्र्ख (निगलना) ग्रोन (गोरा) श्रूच (पवित्र) द्रोत (द्रांती)
र	र	चॉर्य (चुने) छॉर्य (खाली) गॉर्य (सिंघाड़े), जॉर्य (बहरे) सॉर्य (सारे) यपॉर्य (यहाँ से), अलमॉर्य (अलमारी)

याद र्थविव :- नावन, (संज्ञायन) खास नावन, संस्कृत शब्दन, तु हिन्दी शब्दन सुत्य छि असली अछर वर्तावन्य - यिथु पाँठ्य जन:- कृष्ण, भगवान, शिवशंकर, लक्ष्मी, क्षण, मूक्ष, ज्ञान, रौजना !

पी०एन० कौल 'सायिल'



# ऑही (दोयुम छाप)

## तरतीब

शुमार कर, कभि विजि तु  
कथ प्यठ

ग्वड शार-सफ

1. सेदि दाताहस जाँरी
2. शुरिस क्वछि हानस प्यठ
3. " " " "
4. " " " "
5. मंजुल अँलुगवनस प्यठ
6. " " " "
7. विद्या आरम्भ करनस प्यठ
8. " " " "
9. ग्वडनिचि पॅरीक्षायि प्यठ (कूर)
10. " " " "(लँडक)
11. परीक्षायि मंज सफलतायि प्यठ
12. ट्रेनिगि गछनस प्यठ
13. जन्म द्यनस प्यठ
14. गरु नावुयि प्यठ
15. " " " "
16. " " " "
17. प्वफ छे मालिनिस वनुवान
18. माँज लागुनस प्यठ
19. माँज ऑडरुनस प्यठ
20. ऑही
21. कोरि माँज लागुनस प्यठ
22. मेखलायि बेहनस प्यठ
23. मेखलि महाराजस
24. लँडकस खांदरस प्यठ ऑही
25. अलाल खानस ऑही
26. कोरि तु लँडकस खांदरस प्यठ
27. नँव न्वश अनुनस प्यठ
28. कोरि हँदिस खांदरस प्यठ

1. सेंदरि मत्या बोजु जारु पारय सोन-1
2. खनु हॉरी म्याँन् अछि दौरीये-2
3. गुरु गुरु करय-5
4. बॉलिजि मंज करय जाय म्यानि-6
5. लालु फलि करुयो लो तय लो-8
6. त्वलि मंज करय त्वलि त्वलि-10
7. गछ वारु वारय चाटु हालस-12
8. रोजि परवुनी वीद तु प्वरान-14
9. तथ आनुबानस लगुहस पॉय-16
10. लालु फोल गव इमतिहानस-17
11. सरस्वती माता कॅरुनस दया-18
12. नेरि व्वन् रशस तु व्वक्-20
13. गछ सॉ दय दियिनय रुमु रेशुन-21
14. रुति सातु संज लोग गरुनावुनस-22
15. तोशतय यँजमन बाँय पोशतु हय-24
16. माँज शारिकाँय कारस दि तारय-25
17. फोलिनय गुल तु गुलजार मालिन्यो-27
18. माँजि महाराजु माँजि महारेनिये-29
19. माँजि गुल्यन् मुबारक-30
20. राज करि हय राजि रॉनीये-31
21. रंगि नम अज हतय असुवुनिये-34
22. लालु फलि लालो मेखलायि बेह-36
23. शांदार मेखलि हाराजु नोन द्राव-37
24. म्याँन्य ऑही छय यिहय-39
25. गछ आलालखानो चे हा बोड-40
26. म्याँन् ऑही पूशिनय-41
27. नोशिये छावी खख तु शाँदी-43
28. तनु रँछिखय रतु कतरव तु लोलो-45



29. " " " " गछि खनुहोरी दूट्यनय दय—47
30. नवि लरि अचनस प्यठ गछ चंदन दारस शोहजार कर—49
31. " " " " छावि कर्मुण महल खानय—51
32. " " " " फूच नीरुयनय रंग महल खानय?—52
33. कोरि हृदिस मालिन्यन  
खससथ हनस प्यठ। टाठि मालिनि माय चॉन्य हाथ—54
34. कोरि हृदिस नेरनस प्यठ अजहय कूरय गरु पनुन गछुनय—56
35. " " " " बरतु हलमस ओहियि साने—58
36. थपल बतस प्यठ चेटि बतु थपल बतु छुनु मंजू—60
37. मिलुचारस मंज रोजनुक  
बांद बांद करनस प्यठ व्यनती तलसॉ रूज्यतव व्वन्य मिलुचारस—63
38. पनुनिस बायिस ओही रूयटुके बायि म्यानि दय रंछिनय—66
39. पनुनि बेनि ओही बेनि म्यानि इचकुनुय तीज नंविन—70
40. पनुनि अर्धांगिनी प्यठ कर्मु लीखाये जय जय कार—72
41. पनुनिस मेत्ररस प्यठ यारु म्यानि राजदानु राज दारे—75
42. ग्वरु दीवस ओजिजी तु धन्य धन्य ग्वरु दीव बु क्याह नजरानु दिमय—77
43. माँफी नामु माँफी दिज्यम—79
44. सॉन्य सिन्य लॉग्य र्वंग क्याह क्वंग तरकारे—82
45. हजुल लॉज हय मैकसी अमि राजु बाये—84
46. " " यसल गॉयि मैकसी आम लोलो—86
47. " " अडवर बुडव लॉग्य किठ वेसिये—88
48. " " मस छुवु बोड वस—90
50. कौशिर्य पौट्य साल चिठि
- (1) नेचिन्य खांदरस प्यठ — 93
- (2) कोरि खांदरस प्यठ — 94
- (3) मेखलायि प्यठ — 95
- (4) कोरि खांदरस शूर्यन हंजि मेखलायि प्यठ — 97
- (5) काह नेथुर/जरु कासयि प्यठ — 99
51. साल काइन निमन्त्र पत्रन — 100
- प्यठ लेखनु खॉतरु कैह छोट्य छोट्य चुपेंछ, शार तु वचन वेतरि युथ  
जि सोन बटु कल्चर तु बटु देव माला ब्रॉह ब्रॉह ति पकि।
52. कृष्ण लीला दर्शनु द्वख चॅल्य त्रबवनु लालय—109



## ऑहियय ऑहियि

सान्यन काँशर्यन बटु गरन मंज छि सानि  
 सभ्यतायि तु संस्कृती मूजूब विजि विजि तु वेलु  
 वेलु रुत्यन सातन, श्वब व्वछबन प्यठ मोकूल तु  
 मुनॉसिब ऑही हुंघ शब्द, पोशतु, छायाख, मुबारक,  
 वरतावनु यिवान। हिहय थ्यकुन्य लायख परम्परा तु  
 मॅर्ययादा रछिनु तु आम करनु खाँतरु यिमु ऑहियि  
 वक्तु वक्तु, श्वब विजिन तु रुचन गर्यन प्यठ म्यानि  
 जैवि द्रायि तु कागजस खचु, रुत्यन मोकन प्यठ  
 ग्यवनु आयि तु यिवान ति छे तु ब्रॉह कुन ति रोजन  
 यिवान ग्यवनु। यि किताब 'ऑही' छे तिमुनुय हुंज  
 सोम्बरन। दपान युस येछि परस तु तस येछि गरस।  
 बु ति छुस दयस मॅगिथ यिमु ऑहियि सारिनुय करान  
 आमुत। मे छि आशा जि यि किताब वाति गरु तु  
 फ्रुच नीरिथ हावि रुत फल। यि सपदि आम ति, तथ  
 प्यठ छम पछ। म्याँन्यव म्वलुवन तु मूलुआंकन  
 करन वाल्यव कॅर यथ किताबि पजि मनु कदुर। ति  
 वनव तिहुंजी जैवि अंदसं प्यठ।

यिमु ऑही छे त्वहि सारिनुय किचु। म्यान्यन  
 कोर्यन, क्युत म्योन दाज, म्यान्यन गोबरन किच



म्याँन्य लाँकरन, म्यान्यन बेन्यन क्युत बाँय सुंद नून  
च्वचि, अतुगथ, बाँय सथ, बेनि सथ तु मलिन्य  
सथ। म्यान्यन न्वशन क्युत म्योन गुलिम्यूठ। शुर्यन  
किच रुच रुच प्रेरणा।

बु मंगु पनुनि इष्ट दीवी शारिका मातायि यिम  
बटु बाँय पनुनि गरु मंज कडनु यिनु पतु छलुछांगरि  
लंगिथ दूर दूर जायन मंज वावु गल्यन लंग्य, तिमन  
हुंद पाय करि! तिमन सारिनुय पनुनि संस्कृती सुत्य  
मनुक मेल तु पजरुक अथुवास व्वपदावनुच करि  
दया दृष्टी! यि किताब छे तिमनुय बटु परम्परायि  
मंज अख अँकिस नखु अनुनुक सँबीलु। सुती कँरिन  
मॉज शारिका यिमु म्यानि आँहियि प्रथ काँसि पनुनि  
पनुनि वेलु तु विजि सफल! तु फ्रुचु नीर्यनख।  
म्याँन्य रुम रुम छिख यिय वनान :-

मंगान छुस इष्ट दीवी शारिकाये,  
प्रँखुट्यतन सारिनुय यिमु आँहियि सारेय।  
परन यिम यिम तिमन फ्रेचर दिज्यख मॉज॥  
चु कँर्यज्यख पूर मनुचे कामुनाये॥०॥

यि म्याँन्य जाती, यि म्योन बटु कौम फौल्यतन,  
स्यठाह फँब्यतन तु रुत अथवास कँर्यतन।  
सनातन धर्म, यि सभ्यता, संस्कृती साँन्य,  
यि नँव पुय साँन्य सतुक व्यस्तार लँब्यतन॥

अख कथ छे ज़रूरी वनुन्य जि यि ओही करि  
खांदरन, नवि लरि अचनस तु मेखलायि प्यठ स्यठाह  
मदद पनुन्य परम्परा तु सोन बटु कलचर ब्रोंठ  
पकुनावनुच ति सीवा। यथ मंज दर्ज अकसर ओहियि  
यिन साम वीदु लयि मंज वनवुनु ति।

शोक वाल्यन, मँछिल्यन तु बँटिलि हुंघन  
चुक्यदारन हुंदिस बांद बांद करनस प्यठ छुस बु  
येम्युक यि दोयुम छाप त्वहि नजरानु तु डालि  
सोज़ान। अथ मंज यिमव रँफीकव मे कुनि नतु कुनि  
रँग्य सहायता कर। दय थँविन तिमन लछि त्रोगुन  
आय तु थंदन पाय!

रुत काँछन वोल  
पृथ्वी नाथ कौल 'सायिल'



# अर्पण



तस पतिव्रतायि स्यञ्जरु, पञ्जरुचि तु श्वदि व्यचारुचि  
मातृशक्ती स्वर्गवासिनि रूपा हस्तू जियि यवस  
बाग फोलरॉविथ स्वर्गस खँच

— सायिल —



# श्रद्धायि कोसम

(कर्म यूगिनी श्रीमती रूपाजी हस्तू सुन्दि नाँव्य)

## रूपाजी चायि स्वर्गद्वारस

लथ दिथ द्रायि संसॉर्य व्यवहारस,  
रूपाजी चायि स्वर्ग दारस ।  
सवर्गु जामु पुरिथ चायि स्वर्गदारस ॥  
रूपाजी चायि स्वर्गदारस ॥०॥

बरतल युस म्वहताज तस निश आव,  
मुर बैरिथ ख्वश तँहन्दि द्वारु सुय द्राव ।  
तस दया वँती वातिहे कुस आरस ॥  
रूपाजी चायि स्वर्गदारस ॥०॥

हक हमसॉय तय ऑशनाव रुशनाव,  
सारिनुय सुत्य ओसुस यखलास ।  
प्रथ अँकिस ऑस दिवान सीनु प्रथ कारस ॥  
रूपाजी चायि स्वर्गदारस ॥०॥

शुर्यन तु बॉचन रथ वंदान पालान,  
व्वपरस ति पनुनुय ऑसुय व्यंदान ।  
गथ कँर्यथुय गँयि यथ चंदन दारस ॥  
रूपाजी चायि स्वर्गदारस ॥०॥

स्यज़रस तु श्वज़रस छ्वह तमि मोरुय,  
अपज़िस पज़रु सुत्य दिचुनय मात ।  
धर्मु वुद्युगु अठ द्युतुन प्रथ कारस ॥  
रूपाजी चायि स्वर्गदारस ॥०॥

पतिव्रता द्रायि तय तिय द्युतुन हॉविथ,  
ड्यकु बँड स्वय ड्यकस ब्रोंठुय गँयि ।  
फिरुनुय तिय थोवुन दुस परिवारस ॥  
रूपाजी चायि स्वर्गदारस ॥०॥

ड्यकुबजि ड्यकु ओस वोथ तय फवलुवुन,  
ऑस हर कॉन्सि बॉगुरावान माय ।  
ग्वणु वँतियि हुंद्य ग्वण हेयि कुस शुमारस ॥  
रूपाजी चायि स्वर्गदारस ॥०॥

छिस मंगान दयिसुय आत्माहस शॉन्ती,  
येति आसि तति आसि रूपाजी ।  
बाग फोलिनस श्रेहँसान सब्ज़ारस ॥  
रूपाजी चायि स्वर्गदारस ॥०॥

रुत्यसुंद रुतुय फिरान स्वर्गुय छिस अनान,  
ब्यनु रोस प्रथ कॉन्सि युस रुत कांछान ।  
'सायिलन्य' श्रद्धायि पोश तँस्य नज़रानस ॥  
रूपाजी चायि स्वर्गदारस ॥०॥



## सेदि दाताहस ज़ोरी

गज म्बखु लम्बूदरु सर्व आधिकारय,  
सेन्दरि मत्या बोजु ज़ारु पारय सोन।  
पादि प्राणाम बोजु वेगनु र्हतारय॥

सेन्दरि मत्या बोजु ज़ारु पारय सोन॥०॥  
प्रभातु समयस गणिशिबल लारय,  
हेमजा सुतम ध्यान दारोयो।  
गणेश ईशि नन्दुनम् येछि व्यस्तारय॥

सेन्दरि मत्या बोजु ज़ारु पारय सोन॥०॥  
एकदन्त वक्र तुन्डु सर्व आधारय,  
रक्त गात्र धूम्र नेत्र पारोयो।  
कल्पु वृक्ष, भक्ति रक्ष बालु चँदोरय॥

सेन्दरि मत्या बोजु ज़ारु पारय सोन॥०॥  
ही गजाननु वनतु वथ कपोर्य गारय,  
आदि दीवु करतु व्वपुकारोयो।  
मोह अनि गटि कति पय चोन छारय॥

सेन्दरि मत्या बोजु ज़ारु पारय सोन॥०॥  
क्वहनु क्रूठ प्योमुत छुम संसारय,  
जेरु आम कति सना प्रारोयो।  
चुय त्रिकालु दृष्टी करतु केँह चारय॥

सेन्दरि मत्या बोजु ज़ारु पारय सोन॥०॥



भेक्तथन हंदि हा बखशन हारय,

थानु चोन गणपत यारॉयो।

गोब गोम वारयाह पापुन बारय॥

सेन्दरि मत्या बोजु जारु पारय सोन॥०॥

ही मूशकु वाहनु मूलादारय,

व्यनु पोश पम्पोश चारॉयो।

दुपु कन्ठु गनुकुय मुशकु अंबारय॥

सेन्दरि मत्या बोजु जारु पारय सोन॥०॥

‘सॉयिलस’ छु चोनुय डोख तु सहारय,

बरनि चानि तल मुर दारॉयो।

गदि प्यठ छुख बिहिथ बड़ि सरकारय॥

सेन्दरि मत्या बोजु जारु पारय सोन॥०॥



स्वनुहॉरी म्याँन्य अछि दॉरीये

(क्वछि ह्यनस प्यठ)

स्वनु हॉरी म्याँन्य अछि दॉरीये,

इष्टु दीवी कॅयतनय चै यॉरीये।

भय कौस्यनय तु कौस्यनय खॉरीये॥

इष्टु दीवी कॅयतनय चै यॉरीये॥०॥



इयक् नॅव्यनय फोल्नय नोव गुलज़ार,  
वाँसि येछिनय करुनय रुत व्यवहार।  
दय बखशिनय थॅज खानुदोरीये॥

इष्ट दीवी कॅर्यतनय चै यॉरीये॥०॥  
लोलु यावुनस कोसम मुशक् नॉव्यनय।  
स्वख दीनय ज़ाह ति परु मतु पॉव्यनय।  
लानि लीख्यनय शानु सरदोरीये॥

इष्ट दीवी कॅर्यतनय चै यॉरीये॥०॥  
सथ ज़नुनय सीवा रूज़यज़ि करान,  
म्वहताजन हाजथ रूज़यज़ि कड़ान।  
अदु रोज़ी नु ज़ाह ति लाचोरीये॥

इष्ट दीवी कॅर्यतनय चै यॉरीये॥०॥  
गछ चै नीचन रुचरुक पय लॅग्यनय,  
श्वबु कर्मन हुंज चैय कल गॅन्यनय।  
वॅथ्य चै थॅव्य नय म्वहरु गंज सॉरीये॥

इष्ट दीवी कॅर्यतनय चै यॉरीये॥०॥  
दिल वोथ तय इयक् असुवुन चै ऑस्यनय,  
गचि मावुसि पुनिम चंद्रमु चै बॅन्यनय।  
ख्यन डोलुवन द्वद नॅट्य नॉरीये॥

इष्ट दीवी कॅर्यतनय चै यॉरीये॥०॥  
स्वख दीनय मीट्य पादन चै हरदम,  
बुथि मु पॅक्यनय हरगिज़ द्वख तु सितम।  
ब्रॉहु मु पेयनय वुम्बरि बेमॉरीये॥

इष्ट दीवी कॅर्यतनय चै यॉरीये॥०॥



सोरि सामानु नेरि कूर्य वॉरिव कुन,  
ख्वश तु ख्वशहाल सुय गछी अंद वातुन।  
स्वनु द्यारन करतु तोलु बॉरीये॥

इष्टु दीवी कूर्यतनय च़े यॉरीये॥०॥  
सॉरी अर्मान हावस नीर्यनय च़ेय,  
पानु भगवान कर्म लोन शीर्यनय च़ेय।  
डेकि लीख्यनय थंज़ यज़थ दॉरीये॥

इष्टु दीवी कूर्यतनय च़े यॉरीये॥०॥  
नेरि टॉठी नाव सोन रँछरॉव्यज़े,  
शान वॉर्यव्युक हर सातु नेशनॉव्यज़े।  
सब्रु सब्जी प्रावि गाटु जॉरीये॥

इष्टु दीवी कूर्यतनय च़े यॉरीये॥०॥  
स्वख तु सावय पोशिवुन्य् थँव्यनय दय,  
ज़य कूर्यनय धर्मच बूर्यनय लय।  
वँथ्य् थँव्यनय ज्ञानुकी तॉरीये॥

इष्टु दीवी कूर्यतनय च़े यॉरीये॥०॥  
छुय 'साँयिल' द्वछि द्वछि ऑही करान,  
वेरि चाने सुय छुय दैवस मंगान।  
मनुच शॉन्ती थँव्यनय जॉरीये॥

इष्टु दीवी कूर्यतनय च़े यॉरीये॥०॥





## गूर गूर करय (क्वछि ह्यनस प्यठ)

व्वलय म्याँन्य इयकु देद्य गूर गूर हय करय,  
ललुवथ तु सुलु वथ हो हो करय।  
भवॉणी सँहस्त्रनाम पंचस्तवी परय॥

ललुवथ तु सुलुवथ हो हो करय॥०॥

शारिकायि सूज़नख चायख असि गरय,  
महा लॅक्ष्मी चुय सरस्वती चुय।  
असि कोर असत्वथ बरनु आव असि गरय॥

ललुवथ तु सुलुवथ हो हो करय॥०॥

सानि मरि यिथ असि कासख अरु सरय,  
नेरन हज तय हवस असि सॉर्य।  
चानि बाशि वुछ वुछ कोताह स्वख बरय॥

ललुवथ तु सुलुवथ हो हो करय॥०॥

चानि ख्वखजि सुत्य सुत्य अँस्य ति गछव खरय,  
व्यपदायि व्याँज ह्यन पानय पोत।

असनु चानि अदु हरन पोशि अंबरय॥

ललुवथ तु सुलुवथ हो हो करय॥०॥

क्रैकि चिकि चाने ग्रँजि सोनुय गरय,  
फ्वलि अदु आशन हुंद हियि वन।

अकि अकि नेरन अर्मान तय शरय॥

ललुवथ तु सुलुवथ हो हो करय॥०॥



दर्शनु चानि फवलि पोशि ग्वंदरय,  
जंगि यिख तु हर दर्बारु बडि मान।  
येलि चाटु हाल गछख मिठायि लँडय बँगरय॥  
ललुवथ तु सुलुवथ हो हो करय॥०॥

सौर्यसुय वंशस रोजतम स्वखुकरय,  
हैच तु फ्रुच नेरतम चलिहे कूफ।  
बबस तु माजि बन डोख तु आसरय॥  
ललुवथ तु सुलुवथ हो हो करय॥०॥

मॉज इष्टु दीवी रूज्यनय शकदरय,  
वुम्बरि वाँसि कॅर्यनस पानय रँछ।  
‘साँयिलस’ मन व्वदोँस्य अटु रोजि थ्यरय॥  
ललुवथ तु सुलुवथ हो हो करय॥०॥



वाँलिंजि मंज करय जाय  
(लँडकस क्वछि रँटिथ)

रायि चानि चैय वंदय माय म्यानि जिगरो,  
वाँलिंजि मंज करय जाय म्यानि जिगरो।  
सुबु शामु काँछय चै आय म्यानि जिगरो॥  
वाँलिंजि मंज करय जाय म्यानि जिगरो॥०॥



रामु रामु शामु शामु बु हा बोऒुनावथ,

ललु नावथ ल्वलि बु हा सुलु नावथ।

आमि प्यालु यिनु लगी ग्राय म्यानि जिगरो॥

वॉलिंजि मंज करय जाय म्यानि जिगरो॥०॥

चानि बाशि करनु छुम फेकिनुय खसान माज,

गरु अज छु शोलान ज़न वज़ान लोलु साज।

हनि हनि गनान चॉन्य् राय म्यानि जिगरो॥

वॉलिंजि मंज करय जाय म्यानि जिगरो॥०॥

द्वछि द्वछि छी करान ऑही लस सॉ,

नवसॉ तु फ्वल सॉ हँस्यतिस खस सॉ।

शारिका करी रुत पाय म्यानि जिगरो॥

वॉलिंजि मंज करय जाय म्यानि जिगरो॥०॥

रगुनुय छे दग असि व्वथान चानि वदुनय,

छिय लगान बलायि छिय वंदान च़ेय बदुनुय।

छिय करान ल्वलुमतु लाय म्यानि जिगरो॥

वॉलिंजि मंज करय जाय म्यानि जिगरो॥०॥

मासु व्वहरवॉदिस सबु शेऒुनावय,

ऑशनाव रुशनाव सालु अनुनावय।

फ्वलि यँजमन तु यँजमनबाय म्यानि जिगरो॥

वॉलिंजि मंज करय जाय म्यानि जिगरो॥०॥

येलि ख्वखुज करख तु कोठुय च्वचि बॉगरावय,

वतुनि गुरिस मखमँल्य् पलनु पॉरावय।

रछिनस चे थवुनय बु दाय म्यानि जिगरो॥

वॉलिंजि मंज करय जाय म्यानि जिगरो॥०॥



ओप चोप करनस खिर करुनावय,  
पनुनि अथु पॉन्य पानु सुय आपरावय।  
बॉगरय लँड्य तु मिठॉय म्यानि जिगरो॥

वॉलिंजि मंज करय जाय म्यानि जिगरो॥०॥  
रछि गरुनावय राशि चानि वेरे,  
मंगुनावय गिंदन तमाशि म्यानि जिगरो।

‘साँयिलस’ छु चोन परवाय म्यानि जिगरो॥

वॉलिंजि मंज करय जाय म्यानि जिगरो॥०॥



लालु फलि करुयो लो तय लो

(मंजुल अँलुरावनस प्यठ)

हुबु र्वनि मंजुलाह अँलुरॉयो,  
लालु फलि करुयो लो तय लो।  
चे तु चेय बस चेय लोल बरुयो॥  
लालु फलि करुयो लो तय लो॥०॥

येछ्य येछ्य काँछ्य काँछ्य अथि आहमो,  
दशि थँविथ मँग्य मँग्य मरि आहमो।  
दीवकी तु वासदीवनि शामु स्वंदरो॥  
लालु फलि करुयो लो तय लो॥०॥



चंदनु शोष्ठी द्वहं जन्मस च आख,  
 भाँदुरप्यतु गट्ट पँछ कौलु गरि जाख।  
 जु सास जु कुनव्रह अगस्त ग्वरु वारि दोह॥  
 लालु फलि करुयो लो तय लो॥०॥

चे द्युतुथ सदा फोल मनु पम्पोश,  
 जोश वोथ वदवि आव होशन होश।  
 ग्रज वँछ मुबारकन नेबरु तु अँन्दरो॥  
 लालु फलि करुयो लो तय लो॥०॥

आशन सान्यून अज रुत फल द्राव,  
 दौद जूरि चोंग कौलन गाश आव।  
 दतौत्री पौत्रो हा स्वखु दायको॥  
 लालु फलि करुयो लो तय लो॥०॥

शारिका इष्ट दीवी चे रछियो,  
 सास तय लछि वुहुर वातुनावियो।  
 सरस्वती ब्वद तु विद्या दियि यो॥  
 लालु फलि करुयो लो तय लो॥०॥

नाव खांदानुके कुहा नेषनॉव्यजे,  
 विजि विजि नँव्य् नँव्य् कमाल हॉव्य्जे।  
 ग्वरु दारु ग्वरु गीता चे परुयो॥  
 लालु फलि करुयो लो तय लो॥०॥

नजरि बंद चँशमि बंद, दूर बंद बलाय चे,  
 दौद्य व्यॉज रूग जांह मु व्यॉप्यनय चे।

वारु वति रूज्यज्यम म्यानि क्वलु तारुको॥


लालु फलि करुयो लो तय लो॥०॥

अँछ गाशि आश चॉन्य् वाँसि रूजिन,

बबु भगवान सॉन्य् नाद बूजिन।

‘सॉयिल’ यि ओही येछि करुयो॥

लालु फलि कारुयो लो तय लो॥०॥



ल्वलि मंज करय ल्वलि ल्वलि

(मंजुल अँलरुनस प्यठ)

ल्वलि मंज करय ल्वलि ल्वलि,

हा लालु फल्यो च़ेय।

वँजनस बु चाने कलि॥

हा लालु फल्यो च़ेय॥०॥

छुख नूरु बोरुत म्योन,

नुन्दु बोन खानय मोल।

छसुयो वुछान थलि थलि॥

हा लालु फल्यो च़ेय॥०॥

इयकु चोन ज़न पम्पोश,

हूरन छु निवास होश।

बेमर वुछिथुय बलि॥

हा लालु फल्यो च़ेय॥०॥



जिगुरुच बु चावथ वस,  
 येलि टाठि लगी रस।  
 मस चुय गछख गलि गलि॥  
 हा लालु फल्यो च़ेय॥०॥

हुबु बो छसय अँलुरान,  
 मन्जुलाह यि आँलीशान।  
 तँथ्य म्वख्तु जोर फलि फलि॥  
 हा लालु फल्यो च़ेय॥०॥

जुव हो वन्दय अँछ गाशि,  
 छुख बाशि करान क्याह।  
 रूंत बोल बोश अडुकलि॥  
 हा लालु फल्यो च़ेय॥०॥

मदरसु पतु कालेज,  
 लॉगिथ गछख येलि बेज।  
 तेलि शर मे जिगरस च़लि॥  
 हा लालु फल्यो च़ेय॥०॥

अँल्युमँच गछी येलि ज़ान,  
 तेलि खसि साँनी शान।  
 अछि पोश ज़न दिल फवलि॥  
 हा लालु फल्यो च़ेय॥०॥

प्यख वँस्य मे वॉलिंज छेनि,  
 येलि ख्वखजि करान ज़ांह।

आँही

क्रेकि चानि ख्वर मे ति डलि॥

हा लालु फल्यो च़ेय॥०॥

बोड वातुहम जवान,

दोर आसख गोछु शेरान।

शानु व्वगुन्यन दुसु पॅट वलि॥

हा लालु फल्यो च़ेय॥०॥

लेखुपरि पतु बनख अफसर,

खसख कुर्सि तु दिख आर्डर।

अन्याय पोत खोरि च़लि॥

हा लालु फल्यो च़ेय॥०॥

सपदख चु नामावार,

फवलि सोन नोव गुलज़ार।

‘साँयिलस’ अदु अर्मान च़लि॥

हा लालु फल्यो च़ेय॥०॥



गछु वारु कारय चाटुहालस

(लॅडकस विद्या आरम्भ करनस प्यठ)

सातु पर ग्वडु अछुर लेख ओंकारय,

गछु वारुकारय चाटुहालस।

पानु सरस्वती गंडी अॅल्यमु दस्तारय॥

गछु वारुकारय चाटुहालस॥०॥



वर्दी लाग नेर नवि अनुमानय,  
बैग त्रेशि बोतल लंच सामानय।  
अथि रुमाल बूठ पॉलिशि दारय॥  
गछु वारुकारय चाटुहालस॥०॥

मोल मॉज माम ह्मथ नेर सॉ वाह वाह,  
जंगि आयि कामुदीन बैयि कन्या।  
बर्फी डबु छिय सॉदुर वारय॥  
गछु वारुकारय चाटुहालस॥०॥

अज येलि बब मॉज नानि तय बुइयबब,  
हमसायन तु ऑशनावन दिवान सब।  
खिरु खंडु ख्यावान छिख म्यवु जारय॥  
गछु वारुकारय चाटुहालस॥०॥

पाठशालायि सारिनुय बॉगरावय,  
फैकि खसान माज पछ नु यिवान छय।  
छय मॅहॅल्य मॅहलस सॉर्यसुय पारय॥  
गछु वारुकारय चाटुहालस॥०॥

स्वखुदायक नेर क्वल नेशनावुन,  
क्वलु तारुख नेर क्वल प्रजलावुन।  
रोज सरस सारिनुय बन चु शानदारय॥  
गछु वारुकारय चाटुहालस॥०॥

अन अछुर छु ज़ोर तु कोल बैयि नाबीना,  
तसनु कुनि आसान धर्मीह नॅ दीनाह।



ऑही

विद्या छे जिन्दगी हुंद तुमारय ॥

गछु वारुकारय चाटुहालस ॥० ॥

ब्रह्मन जन्म ह्यथ लॉजिमी छे विद्या,

ऑल्यमु प्रकाशि रोस प्रावि क्याह करि क्याह ।

नाबुकारन मंज गछि शुमारय ॥

गछु वारुकारय चाटुहालस ॥० ॥

विद्या चे गटि मंज गाशाह हॉव्यनय,

जगतस मंज यश तु मान बँडरॉडव्यनय ।

रुति स्वखु नखुवाल रुत्य रुत्य कारय ॥

गछु वारुकारय चाटुहालस ॥० ॥



रोजि परुवुनी वीद तु प्वरान ।

(लड़की हुंदिस विद्या आरम्भ करनस प्यठ)

सॉन्य कूर सरस्वती रूपु आसुवुनी,

रोजि परुवुनी वीद तय प्वरान ।

स्वय मॉज रूज्यनय दया करुवुनी ॥

रोजि परुवुनी वीद तय प्वरान ॥० ॥

कोरि मोरि विद्या शेरस छे ताज,

लॅक्ष्मी रॉज्य छस कॅर्यतन राज ।

विद्या छे बोड दाज, स्वछ आसुवुनी ॥

रोजि परुवुनी वीद तय प्वरान ॥० ॥



येछयनय रुत रुत परुन लेखुनये,  
 दयि नाव गरि गरि देरुवुनये।  
 तमि सुत्य ब्वद्ध छै व्यकास लबुवुनी॥  
 रोजि परुवुनी वीद तय प्वरान॥०॥

न्यथ अछुर ग्वडुन्यथ गछि स्मरुनुय,  
 पतु बीजु मन्त्र हेछ 'तु परोनुय।  
 गायत्री मौज छय जय दिवुवुनी॥  
 रोजि परुवुनी वीद तय प्वरान॥०॥

अठकल वति लॉग्यनय सरस्वती,  
 बैङ्गनय स्वकर्मन हुंजुय प्रवरंती।  
 स्यजरस तु पजरस लय बरुवुनी॥  
 रोजि परुवुनी वीद तय प्वरान॥०॥

पजुनस येछूनय लोग रोजुनुय,  
 पजतिस गछि गॅज गाह करुनुय।  
 श्वदि म्वखु गीता रोज परुवुनी॥  
 रोजि परुवुनी वीद तय प्वरान॥०॥

बैय सुंद वुछिय गछि ख्वश सपदनुय,  
 तैलि येछि पानस ति पनुनि कर्मनुय।  
 रुत बैयिस कांछिनु रुत्य छि बनवुनी॥  
 रोजि परुवुनी वीद तय प्वरान॥०॥

**‘सायिल’** हलम दारिथ छु मंगुवुनुय,  
 कोर्यन रुत सायि, बोग यछुवुनुय।  
 शूभ तय शर्म गछि वाँसि पोशिवुनी॥  
 रोजि परुवुनी वीद तय प्वरान॥०॥



तथ आनु बानस लगुहस पॉर्य  
(कोरि हंडिस ग्वडुन्युक इम्तिहान दिनस प्यठ)

म्यॉनय् अछिदॉर द्रायि यिवुनु इम्तिहानस,

तथ आनु बानस लगुहस पॉर्य।

कामयॉबी आसि तस मीज्ञानस॥

चिक् चवु शानस लंगुहस पॉर्य॥०॥

आनु कमि द्रायि स्वय दिनि इम्तिहानस,

सुत्य सामानस लगुहस पॉर्य।

यिति छा अभ्विका गछि इम्तिहानस॥

अथ खबरनामस लगुहस पॉर्य॥०॥

दय बूज़िन यियिन फॉस्ट इम्तिहानस,

तथ नॅतीजि नामस लगुहस पॉर्य।

कामयाब रूज़िनम प्रथ इम्तिहानस॥

तॅथ्य ब्वद्धि तु ज्ञानस लगुहस पॉर्य॥०॥

इम्तिहानुच तयॉरी स्वय करि पानस,

दॅरुगवनस बो लगुहस पॉर्य।

प्रश्नु व्वतर दिनुकिस अनुमानस॥

लेखनस, बोज़ुनावस लगुहस पॉर्य॥०॥

स्व ब्वद्ध रूज़्यनस डंजि च्यथ पानस,

च्यतुसुय थावुनस लगुहस पॉर्य।

समझनुच अठकल यीनस पानस॥

कथ व्यछुनावनस लगुहस पॉर्य॥०॥



जुव ज्यतु स्वय दियि जिन्दु खांदानस,  
तथ नेशनावनस लगुहस पौर्य ।

स्व छे पानु शारिका आमुच जहानस ॥

पानु मस्तानस लगुहस पौर्य ॥० ॥

प्रजलावि नाव म्योन पछ छम पानस,

पछ रँछुरावनस लगुहस पौर्य ।

**‘साँयिल’** छुय मंगान यी भगवानस ॥

श्वहरथ प्रावनस लगुहस पौर्य ॥० ॥



**लालु फोल गव इम्तिहानस**

(लँङकस ग्वडन्युक इम्तिहान दिनस प्यठ)

लालु फोल म्योन गव सुलि इम्तिहानस,

इखि छुस गणपत सेदि दाता ।

सुय दियस रुत ह्यस तस अनुमानस ॥

इखि छुस गणपत सेदि दाता ॥० ॥

साँरी मजमून वारुकारु सँज्यूनस,

च्यतुसुय गँछ्यूनस तिम पूरि पूर ।

सारिन्युय सवालन जवाब बनावनस ॥

इखि छुस गणपत सेदि दाता ॥० ॥

सुलि वँथिथ साँरी सबक देँरुवनस,

तीय याद थावनस रूज्यूनस द्रढ़ ।

सॅन्य् सॅन्य् तमिकुय सार पलि पावुनस॥

इखि छुस गणपत सेदि दाता॥०॥

श्रूच थवि प्रकृथ श्वद व्यचारुनस,

श्रोचि अनु रोज्यस श्वज़रुक ज्ञान।

प्रथ कांह पाठ वारुकारु व्यछ्छनावुनस॥

इखि छुस गणपत सेदि दाता॥०॥

भगवान भजन रॉतिब पॉट्य करुनस,

अठुकल थॉव्यस रुति रूत ध्यान।

पोज़ अपुज़ चारुनस बैयि परखावुनस॥

इखि छुस गणपत सेदि दाता॥०॥

‘सॉरिल’ स्वफलता मंगान भगवानस,

कामयॉबी सुत्य यियी अथुवथ।

तरकी करुनस थॅज़ कुरुस्य् प्रावुनस॥

इखि छुस गणपत सेदि दाता॥०॥



सरस्वती माता कॅर्यनस दया

(कोरि हुंदिस इम्तिहानस मंज़ सफलतायि प्यठ)

अछि दॉर म्यॉन्य् गछि स्वफल परीक्षाये,

सरस्वती माता कॅर्यनय दया॥

मीट्य दिनि कामयॉबी तस आये॥

सरस्वती माता कॅर्यनय दया॥०॥



सॉरी परचि कॅर्यजि आये आये,  
सारिनुय प्रश्नन लीख्यज्यम व्वतर।  
सॉरी विषय स्वय व्यछुनुनि द्राये॥  
सरस्वती माता कॅर्यनय दया॥०॥

द्वहदिश सुबहय दॅरुनान द्राये,  
लेखन परान यछाये आस।  
वारु पॉठ्य सॅन्यज्यम प्रथ अघ्याये॥  
सरस्वती माता कॅर्यनय दया॥०॥

तॉलीम ऑजि करान छवपि सुत्य माये,  
परुनस यिनु पॅत्य् यिवान आसख।  
सुय छुय स्वफलतायि हुंद व्वपाये॥  
सरस्वती माता कॅर्यनय दया॥०॥

बोर्ड तय व्वकुस ह्यथ अम्बिका द्राये,  
पछ मा आये ज्ञान्य्म दय।  
लोलु ओश अँछिवुय वोथ ददुराये॥  
सरस्वती माता कॅर्यनय दया॥०॥

पनुनी मेहनँच रुत फल द्राये,  
टय्स्टस ऑयिये फॅस्ट पूजिशन।  
ज्वफु मासु सॉरी छायकस आये॥  
सरस्वती माता कॅर्यनय दया॥०॥

“चालि तय डालि पॉर्य” ‘सॉयिल’ लोगयय,  
लंचि व्वकुस ह्यथ सुय मदुरस ओय।  
चानी कॅज तय चानी माये॥  
सरस्वती माता कॅर्यनय दया॥०॥



नेरि व्वन्य् राशस तु व्वक् पवलुनम  
(ट्रेनिंगि गछुनस प्यठ)

ट्रेनिंगि नाव द्राव असि अँछ गाशस,  
नेरि व्वन्य् राशस तु व्वक् पवलुनम।  
थदि थोद ओहदुकिस नेरि तलाशस॥  
नेरि व्वन्य् राशस तु व्वक् पवलुनम॥०॥

दय म्योन कॅर्यग्नस हुर्यर यादाशस,  
च्यतु वोतरिस वॅथिनस खय तु जंगार।  
गट्ट दूर गॅछ्यनस पय लग्यस गाशस॥  
नेरि व्वन्य् राशस तु व्वक् पवलुनम॥०॥

थदि थॅद्य नंबरात अनि इम्तिहानस,  
अदु करुनस तति ल्वलुमतुलाय।  
द्वहदिश बॅर्चर तस शाबाशस॥

नेरि व्वन्य् राशस तु व्वक् पवलुनम॥०॥

ट्रेनिंगि पतु अद अफसॅरी करुनस,  
खसुनस कारन तु छावुनस मॅहल।  
नौकरन हुकुम दिथ कामि करुनावुनस॥  
नेरि व्वन्य् राशस तु व्वक् पवलुनम॥०॥

अथु अथु रौट म्वहताजन करुनस,  
बरुनस चन्दु जौरूरत मंदन।

व्वपुकार करुनस तु यछ् पछ् बरुनस॥

नेरि व्वन्य् राशस तु व्वक् पवलुनम॥०॥



‘साँयिल’ छु लोगमुत आँही करुनस,  
 मंगुने दयस लोग च़ेय क्युत स्वख।  
 पतु लँगिथ ईशरस वारु वति थावुनस॥  
 नेरि व्वन्य् राशस तु व्वक्क फ्वलुनम॥०॥

ॐ

गछ् सॉ दय दीनय रुमु रेशुन आय  
 (जन्मघनस प्यठ)

जिदु रोज़ लछि त्रोगुन आँस्यनय आय,  
 गछ् सॉ दय दीनय रुमु रेशुन आय।  
 रँछिनय शारिका व्वंदुची माय॥  
 गछ् सॉ दय दीनय रुमु रेशुन आय॥०॥

उत्य् उत्य् कार च़य करुवुन रोज़,  
 म्वहताजन हुंज़ ज़ॉरी बोज़।  
 फ्वलुनस तु नवुनस च़े पोशन पाय॥  
 गछ् सॉ दय दीनय रुमु रेशुन आय॥०॥

रुत यछ् प्रथ काँसि रुच़रुय कर,  
 तमि सुत्य नीर्यनय लान्युन वर।  
 धर्मु रक्षायि हुंज़ गॅन्य् नय लय॥  
 गछ् सॉ दय दीनय रुमु रेशुन आय॥०॥

दयि ह्यतुकारस रोज़ व्वमेदवार,  
 बे वॅसीलन हुंद बन तर्फदार।

ग्वरु वचैनन कैर्यजि ल्वलुमतुलाय ॥

गछ सॉ दय दीनय रुमु रेशुन आय ॥० ॥

श्वद्ध नीचन मील्यूनय चै रुत फल,

छलु छांगुर काँस्यूनय अदलु बदल ।

वासनायन नीर्यनय चै छ्वकु ग्राय ॥

गछ सॉ दय दीनय रुमु रेशुन आय ॥० ॥

तोलबार कर बाँगराव म्वहताजन,

मिसकीनन बेकसन बेछिवुन्यन ।

तिहिंद्य रुम मंगूनय चै रुत पाय ॥

गछ सॉ दय दीनय रुमु रेशुन आय ॥० ॥

छुय मुबारक **‘साँयिलुन’** थोद हुदु प्राव,

कामयाँबी कामराँनी प्राव ।

द्वख दाद्यन हुंज रूज्यूनय मु छाया ॥

गछ सॉ दय दीनय रुमु रेशुन आय ॥० ॥



रुति सातु संज लोग गरु नावुनस

(गरु नावुयि प्यठ यँजमनबायि)

यँजमनबाय यियि ना व्वलुसुनस,

रुति सातु संज लोग गरु नावुनस ।

जाजि लछजि जलुर्य जाँज हाय वालनावुनस ॥

रुति सातु संज लोग गरु नावुनस ॥० ॥



पक्ष्यदार मालिन्य् विसबन्द जालान,  
 लोलु तय मायि छी छायक करान।  
 प्वफु लजिमुच हुबु वरि बाँगरावनस॥  
 रुति सातु संज लोग गरु नावुनस॥०॥  
 कूफ कासि माँज भवॉन्त्य् यथ चंदनदारस,  
 दस व्वथि खांदरु किस व्यवहारस।  
 वरदन शेरुनस अँगन वँतुर चारुनस॥  
 रुति सातु संज लोग गरु नावुनस॥०॥

रुत्य् फल माँज भवॉन्त्य् दीनय पानय,  
 यश चोन गेव्यूनय खांदानय।  
 दय इखि रुज्यूनय माय वरतावनस॥  
 रुति सातु संज लोग गरु नावुनस॥०॥  
 गछ हैन्जे करुनुय नीर्यनय फ्रूच,  
 श्रूचिस दारस सोरुय श्रुच।  
 लोलु व्यवहारस नाव नेशिनावनस॥  
 रुति सातु संज लोग गरु नावुनस॥०॥

तुम्बक नारि वायिनस तु शोकलम करुनस,  
 श्वभ श्वभ वचन, लीलायि, बाँथ ग्यवनस।  
 येछ्यूनय शारिका चायि चावु नावनस॥  
 रुति सातु संज लोग गरु नावुनस॥०॥

**‘साँयिल’** आव ह्यथ आँही नामय,  
 गँछ्यूनय स्वफल यीनय रुत अंजामय।  
 भजन करु नावनस, अर्थव्यछुनावनस॥  
 रुति सातु संज लोग गरु नावुनस॥०॥



तोशतय यँजमन बाँय पोशतु हय छुय  
(गरनावयि प्यठ यँजमन बायि पोशतु)

रुत छुय नक्षत्र तु साथ न्यदोश तय,  
तोशतय यँजमन बाँय पोशतु हय छुय।  
येछि सेदि दातुहस लाग व्यनु पोश तय॥  
तोशतय यँजमन बाँय पोशतु हय छुय॥०॥

माजि भवाणि श्वब कारियस दस तुल,  
लोग तुंबख नार्यन गागर्न ठस।  
यिसबंद कांगर्न खोतमुत बोश तय॥  
तोशतय यँजमन बाँय पोशतु हय छुय॥०॥

वीदु स्वरु लयि कोर दीवियव हैंजे,  
केंजे पोन्य् बर तु छिरकाव।  
जावि लछुजि हाय वालनुक असि रोश तय॥  
तोशतय यँजमन बाँय पोशतु हय छुय॥०॥

नविनुय प्वशाकन छिय दिवान अंग तय,  
जंग छय नैव्य् अटुहैर्य लागनस।  
प्रथ अंदु छायिकन थावतम गोश तय॥  
तोशतय यँजमन बाँय पोशतु हय छुय॥०॥

वारु कारु वरि दीकचि ह्यथ नेर माल्युन,  
नेरुन रुति सातु दपनि छुय अँज्य्।  
थव परम्परायि हुंद ह्यस बैयि होशतय॥  
तोशतय यँजमन बाँय पोशतु हय छुय॥०॥



वॉरिव्यु तु मालिन्यु बंद बांधव तय,  
 आयि हय लोलु तय मायि गरु चोन।  
 देहवुन्यु दर्यन वुछतु व्वलसनुक बोशतय॥  
 तोशतय यँजमन बाँय पोशतु हय छुय॥०॥  
 अंगन ऑशनावन मेत्रन तय व्यसन,  
 सँदरन सालुक कँर्यजि बांद बांद।  
 अद हय मनसुय यियी संतोष तय॥  
 तोशतय यँजमन बाँय पोशतु हय छुय॥०॥

हथ हथ मुबारक “सॉयिल” छुय करन,  
 छुय मंगाल दातुहस कारस दि तॉर।  
 यँजमन छु प्रेयमु अमर्यथ करान नोशतय॥  
 तोशतय यँजमन बाँय पोशतु हय छुय॥०॥



मॉज सेदि बुथि कारस दि तारय!

अर्दु रातन बोजि ज़ारु पारय,  
 मॉज सेदि बुथि कारस दि तारय।  
 मॉज शारिकॉय कर पनुन चारय॥  
 मॉज सेदि बुथि कारस दि तारय॥०॥

मोह सेंदि मंज यीरु अँस्यु गॉमुत्यु,  
 लूभु मदु किन्यु गीर अँस्यु गॉमुत्यु।  
 अंधुकारन थँव्यु नु कुनि सारय॥  
 मॉज सेदि बुथि कारस दि तारय॥०॥



यछ रछतम मॉजॉय डखि रोज़तम,  
कर्म हीनस नालु फॅर्ययाद बोज़तम।  
कति छारथ कोत कोत लारय॥

मॉज सेदि बुथि कारस दि तारय॥०॥

आवुलनिसुय मंज छुस करान ग्वतु ग्वथ,  
सॅर्य पेठ्य सॅहलाबन डॉजिम वथ।

द्वखु दाद्यन छुमनु शुमारय॥

मॉज सेदि बुथि कारस दि तारय॥०॥

क्वहनु संसॉर्य ज़लुरी वूनुम ज़ाल,  
पॉट्य क्योम गोम वोल् मे पॉन्य पानस नाल।  
कड मे अमि मंजु नतु गछु मारय॥

मॉज सेदि बुथि कारस दि तारय॥०॥

अंग ऑशनाव माता चुय छख म्यॉन्य,  
अख आसुरु चोनुय तु सथ छम चॉन्य।  
सायि चोन तय चोनुय सहारय॥

मॉज सेदि बुथि कारस दि तारय॥०॥

न्याय कर्मन्य छख चुय अँजुरावान,  
बरु गॉमुत्य नवि सरु फोलुरावान।  
सग चोनुय छु अमर्यतुदारय॥

मॉज सेदि बुथि कारस दि तारय॥०॥

नेशब्बदिनुय मूर्खन दितु अठुकल,  
न्यर्बलनुय मॉजॉय दिय ब्वज़न बल।  
ज्ञानु दात्री छख कल्याण कारय॥

मॉज सेदि बुथि कारस दि तारय॥०॥



सोर सामानु हय छुम आँडुराँविथ,  
 खाम कौंदु आपन आँस वाहँराँविथ।  
 करतु 'सॉयिलन' पानु व्वधारय॥  
 मॉज सेदि बुथि कारस दि तारय॥०॥



फोलिनय गुल तु गुलज़ार मालिन्यो  
 (शुर्यन हुंज़ प्वफ छे मालिनिस वनुवान)

मालिन्य् सथ छे सबज़ार मालिन्यो,  
 फोलिनय गुल तु गुलज़ार मालिन्यो।  
 लगुयो पॉर्य नामदार मालिन्यो॥  
 फोलिनय गुल तु गुलज़ार मालिन्यो॥०॥

बबु सुंद डोख माजि हुंज़ रफाकत,  
 प्रथ कौन्सि कोरि दिलसुय शौहलथ।  
 बॉय सथ छु बोड शौहजार मालिन्यो॥  
 फोलिनय गुल तु गुलज़ार मालिन्यो॥०॥

सुलि आव बुलबुल ब्यूठुम कनु दरि,  
 अँछ हैचुन फोरुन्य् विज़ि विज़ि गरि गरि।  
 स्वखु शौछि कॅरनस ब्यदार मालिन्यो॥  
 फोलिनय गुल तु गुलज़ार मालिन्यो॥०॥

हम सायन गॅयस वोनमख हाल,  
 मालिन्यून छुम व्वछुब कोरहम साल,  
 वॅर करुनस जंग मै शूबिदार मालिन्यों॥  
 फोलिनय गुल तु गुलज़ार मालिन्यो॥०॥

मालिनिच शॉद्य छम छस शादमान,  
 ब्वक् छिम फवलान छसनु कुनि बु व्यचान।  
 कसनु कोरि मालिन्युक अमार मालिन्यो।  
 फोलिनय गुल तु गुलज़ार मालिन्यो॥०॥

अँज्य् छम मॉन्ज़ लागुन्य खानु माजे,  
 प्रार्यम तु छार्यम बाँय राजे।  
 ज़न हय वॉच मनुची तार मालिन्यो॥  
 फोलिनय गुल तु गुलज़ार मालिन्यो॥०॥

बबु माल्युन तय माजि माल्युन,  
 बाँय ताल्युन गव र्वपु ताल्युन।  
 चुय छिहमा दिलुकुय करार मालिन्यो॥  
 फोलिनय गुल तु गुलज़ार मालिन्यो॥०॥

**“सायिल”** बेनिनुय प्रारान छुय,  
 ओरु योरु वॅन्य् दिवान छारान छुय।  
 मालिनि हा चंदनदार मालिन्यो॥  
 फोलिनय गुल तु गुलज़ार मालिन्यो॥०॥





# मॉन्जि महाराज, मॉन्जि महारेनिये (मॉन्जि महाराजन तु मॉन्जि महारेन्यन)

व्वसु द्रवसु, चिकु चाव छिय आसुवुनिये,

मॉन्जि महाराज, मॉन्जि महारेनिये।

मुबारक मॉन्जि रॉच क्याह थछ शूबुवुनिये॥

मॉन्जि महाराज, मॉन्जि महारेनिये॥०॥

आशिनाव रुशनाव हुबु छिय वातान,

वुरु बलु वाजु वयाह खान पकुवान।

बानन छै ठसुराय दूरि बासुवुनिये॥

मॉन्जि महाराज, मॉन्जि महारेनिये॥०॥

ग्वडु छिय ख्वर तु अथु श्रोचुरावानय,

पतु नवि तोलियायि व्वथुरानय।

मॉन्जि अँस्य पतु वथ छिय लागु वुनिये॥

मॉन्जि महाराज, मॉन्जि महारेनिये॥०॥

प्वफ छय सारिनुय मॉंज बाँगरावान,

साँरी छि मॉन्जि पाँसु तस पिलुनावान।

वनु वन वाजिनि मॉन्जि छय वनुवुनिये॥

मॉन्जि महाराज, मॉन्जि महारेनिये॥०॥

सबि बीड्य सालुर्य खेनि पकुवानय,

शुर्य बँड्य मर्द क्योहो जनानय।

यिथि मोकु क्रख तु चिख छय ग्रजुवुनिये॥

मॉन्जि महाराज, मॉन्जि महारेनिये॥०॥



प्रथ अंदु बोज़ान छायक मुबारक,  
 प्वफि तुल माँजि डुल बाँगराव्यख।  
 बनारस्य माँज छय शोख आसुवुनिये॥  
 माँजि महाराजु, माँजि महारेनिये॥०॥

गिन्दन गॅर्य छि छकुराह तय लागानय,  
 गागरि नॅट्य तंबखनारि वायानय।  
 माँजि मुबारक छिय ग्यवुनिये॥  
 माँजि महाराजु, माँजि महारेनिये॥०॥

माँज छय रुत शोगून रंग खारॉनी,  
 क्रूल छुय वारु दार शुबरॉनी,  
 यिमुवुय सुट्टय खांदर छि बासुवुनिये॥  
 माँजि महाराजु, माँजि महारेनिये॥०॥



## माँजि गुल्यून मुबारख

माँज आँडुर स्वन डुल्यून, माँजि गुल्यून मुबारक।  
 फोरु वुन्यून बुलबुल्यून, माँजि गुल्यून मुबारक॥  
 माँजि द्योकाह मंज अथन, प्वफि लोगुय लोलुसान।  
 म्वखतु नमन असुवुन्यून, माँजि गुल्यून मुबारक॥  
 शोक् लागान तलुपॅतिस, रुतिस आय कांछान।  
 पायि नाज़न पोशि तुल्यून, माँजि गुल्यून मुबारक॥  
 साम वीदुक्कयव लोलु स्वरव, हुबु छी हेंजे करान।



माँजि वचनन, वन वन हुयन, माँजि गुल्यन मुबारक ॥  
 प्वफु छि माँजि बाँगरावान, कुसनु छुय थपुथफ करान ।  
 काँशी प्यठु अँन्य नचन नचन, माँजि गुल्यन मुबारक ॥  
 गंगु जल त्रावव अथन ख्वरन, तमी सुत्यन श्वदी च्यथ ।  
 पाप चलन शाप हरन, माँजि गुल्यन मुबारक ॥  
 ही तय मसवलु मँत्य छे करन, हारि लागान आयि माँजि ।  
 पोशि थर्यन अँतरि छुक्यन, माँजि गुल्यन मुबारक ॥  
 छायक मुबारक पोशतु करन, फवलान यँजमन तु यँजमन बाय ।  
 वुडु तय यिस्बन्द टिस टिस करन, माँजि गुल्यन मुबारक ॥  
 हारि पोरन अथन ख्वरन, चावु करनस गुलकाँरी ।  
 तुजव तु बुरशत्रु तस शुबुरावन, माँजि गुल्यन मुबारक ॥  
 महेरेन्यन तय महाराजन, माँजि अनान वुछ क्याह शूब ।  
 आँही तिमन 'सायिल' छु करन, माँजि गुल्यन मुबारक ॥



## राज करि हय राजि रॉनीये

(आँही)

द्वछि द्वछि छय च़ेय आँही म्याँनी,  
 राज करि हय राजि रॉनीये ।  
 इयकुनुय चंदन दार रोज़ि छावाँनी ॥  
 राज करि हय राजि रॉनीये ॥० ॥



पनुनि डेरु सेर कॅरिनय मॉज भवॉणी,  
गरि पनुनि स्वख भूगॉनीये।  
पनुन्यन छे तेलि चम शिहिज रोजॉनी॥  
राज करि हय राजि रॉनीये॥०॥

रुम रुम म्याँन् चिय यिय यछॉनी,  
रथि खँसिनय चै जिंदगॉनीये।  
दयि सुंज रूज्यनय बॅड मेहरबॉनी॥  
राज करि हय राजि रॉनीये॥०॥

बागस रूजिनय गुल चै फवलॉनी,  
अंदु वंद रूजिन मुशकॉनीये।  
लंग लंजि रूजिनय बहार हावॉनी॥  
राज करि हय राजि रॉनीये॥०॥

इयकुन तीज फोल्नय, रूज्यनय नवॉनी,  
पूशिनय सथ चै पनॉनीये।  
शिहिज बून् रूज्यनय शेहलथ दिवॉनी॥  
राज करि हय राजि रॉनीये॥०॥

गरुची ब्रांदुकॅन् छखय दुर्दॉनी,  
दॅर बॅनिन बुनियाद चॉनीये।  
इयकुनी जिय रोज अथु खर्चॉनी॥  
राज करि हय राजि रॉनीये॥०॥

यथ दारस रोजि दय डख करॉनी,  
स्वख तु सुविधा शवब करॉनीये।  
हुम यॅगुन् तु रुत्य्कार रोजन सपदॉनी॥  
राज करि हय राजि रॉनीये॥०॥



मंगुवुन्य् बरु चानि नेरन तोशाँनी,  
 रोज़ख हय प्वण्य् प्रावॉनीये।  
 बाँचि बाँचि रूज़िव असान गिंदॉनी॥  
 राज करि हय राजि रॉनीये॥०॥

योत आसि नु म्वहतॉजी लथ लदॉनी,  
 व्याँज़ संकट नु ब्वहरॉनीये।  
 रोज़ परस तु पनुनिस रुत काँछॉनी॥  
 राज करि हय राजि रॉनीये॥०॥

रूज़्यनय जिठ्यन हुंज़ आँही पोशिवॉनी,  
 नाव रोज़ुख नेशिनावानीये।  
 अटु हय प्रावख कांह ति शादमॉनी॥  
 राज करि हय राजि रॉनीये॥०॥

दयि नाव येछि पछि रोज़ि स्मरॉणी,  
 ग्वरु दीव कॅर्यनय पासबॉनीये।  
 गुपु बब रूज़्यनय सहायता करॉनी।  
 राज करि हय राजि रॉनीये॥०॥

सारिन्य् सुत्य समचार आँज़ि यछॉनी,  
 पूशिनय वाँसि आनमॉनीये।  
 बेनि बाँय सपरिवार रूज़िव तोशाँनी॥  
 राज करि हय राजि रॉनीये॥०॥

रुतिसुय व्वमेदवार “सॉरिल”,  
 रुत ह्योत सारिन्य मंगॉनीये।  
 खखु वुछिथ पनुन्यन ब्वकु छिस फ्वलॉनी॥  
 राज करि हय राजि रॉनीये॥०॥



## मॉन्जि महरैन्

(बडि मालिनिच मॉन्जि महरैनिये)

रंगि नम अज हतय असुवनिये,  
बडि मालिनिच मॉन्जि महरैनिये।  
ख्वर तु अथु कडि जल जल नैनिये॥  
बडि मालिनिच मॉन्जि महरैनिये॥०॥

पलव लागुन्य छिय पगाह किथ्य जान,  
यिम दूरि छिय खनु सुंघ बासान।  
फोटू छुय तुलुन व्वडुनैनिये॥  
बडि मालिनिच मॉन्जि महरैनिये॥०॥

करतु पालिश नमन दंदन कर बुरुश जल,  
लागि तनि चुय रीशिम तु मखमल।  
वाजि अथु छिय क्याह शूबुवनिये॥  
बडि मालिनिच मॉन्जि महरैनिये॥०॥

कॉत्याह शरीफ वॉरिव्य बॉच चॉन्,   
लॉजिनख तोत पनुनी कर्मलॉन्।  
छिय चे व्वन् मीठ्य बूजन खैनिये॥  
बडि मालिनिच मॉन्जि महरैनिये॥०॥

हश ह्युहुर चोन छिय करान इन्तिजार,  
झायवरन वुछ कोताह छुय चाव।  
छुय पगाह गछुन नारु वुजुमैलिये॥  
बडि मालिनिच मॉन्जि महरैनिये॥०॥



व्यवहार छुय करुन इन्जीनरस सुत्त्य,  
बुछ तॅमिस मंज रुत्त्य रुत्त्य ग्वण कुत्त्य।  
शालुमारन फेरि गतु रेनिये॥

बडि मालिनिच मॉन्जि महरेनिये॥०॥

जॉमन तु हशि सुत्त्य कॅरय जि जान व्यवहार,  
ख्वश गॅछिथ चोन करुन गछि कारु बार।

अदु वनुनय छै यि रंबुवनिये॥

बडि मालिनिच मॉन्जि महरेनिये॥०॥

शर्मदोरी छि सॉरी ख्वश गछान,  
लोलु सुतिन तॅमिस न्वशि छिय रछान।  
य्वसु आसी साफ तय प्रॅनिये॥

बडि मालिनिच मॉन्जि महरेनिये॥०॥

**“सायिल”** छुय करान अख ह्यदायत,

ज्यादु फॉशनस रोजुन गछि पथ।

थव वॅलिथ पान मॅ रोजन्यथुनॅनिये॥

बडि मालिनिच मॉन्जि महरेनिये॥०॥



# लालु फलि लालो मेखलायि बेह (मेखलि महाराजस)

गायत्री पॉन्य् पानु आमच सालो,  
लालु फलि लालो मेखलायि बेह।  
सरस्वती आयी जंगि निकु लालो॥

लालु फलि लालो मेखलायि बेह॥०॥

श्रूच पन नॉल्य् छुय गंज हवालो,  
लालो ग्वरु शब्दन वारु सन।

कन थव वीदन तु शास्त्र पालो॥

लालु फलि लालो मेखलायि बेह॥०॥

मनुचे दोजि प्यठ खनुन कमालो,

लालो ऊँ भू भुवः स्वः पर।

सुलि वॅथिथ त्रैयि लटि जफतो मालो॥

लालु फलि लालो मेखलायि बेह॥०॥

यज्ञोपवीत छुय वॉन्सि रक्षपालो,

मान तय आदर कॅर्यज्यस जान।

ग्वरु शब्द पॉल्य् जितु बॅन्यजि मिसालो॥

लालु फलि लालो मेखलायि बेह॥०॥

ललु खोल कॅर्यज्यस प्रथ कुनि हालो,

लालो मन यि थवी सावदान।

यिनु कॅडिथ थावख यिनु गछी गालो॥

लालु फलि लालो मेखलायि बेह॥०॥



हुमु यज्ञनि पंच गयव चतमो प्यालो,  
लालो धर्मे सबि बूजन कर।

शौद तु श्रूच ख्यतमो थालो थालो॥

लालु फलि लालो मेखलायि बेह॥०॥

बबुनुय त्रौवनय येछि योनि लालो,

लालो ब्रह्मन वर्गस चाख।

**‘साँयिल’** छुय वनान छुय नेक फालो॥

लालु फलि लालो मेखलायि बेह॥०॥



शान्दार मेखलि महाराजु नोन द्राव

(मेखलि महाराजस वनुवुन)

वेलु वोत तोशनुक तु संज लोग वारुकारु,

शान्दार मेखलि महाराजु नोन द्राव।

सँम्यतवी विगिन्युव चावु करव आरु॥

शान्दार मेखलि महाराजु नोन द्राव॥०॥

येछि तय पछि यँगनि मंडुपा शेरव,

नेरव लिवने चन्दनु सुत्य तथ।

वुछतु तति क्याह यिन पतु मुशकुनिदारु॥

शान्दार मेखलि महाराजु नोन द्राव॥०॥

गीर्य वस्त्र छिय स्वनु सुन्ध बासान,

कासान मस छिय बनान छुख जूग्यु।

श्रोचि श्रोचि यॅगन्युस छुख बेहान वारुकारु॥

शान्दार मेखलि महाराजु नोन द्राव॥०॥

डेकि छुय क्वंगु टयोक सिरिं ताबानो,

हा अलाल खानो हुर्यनय आय।

रुफ छुख प्रजलान यूगीसुंदि अनुहारु।

शान्दार मेखलि महाराजु नोन द्राव॥०॥

अज वुछ मासु क्याह द्वद बाॅगरावान,

जालान प्वफु छय लोलु यिसबन्द।

माता माल हुबु छिय करान व्यवहारु॥

शान्दार मेखलि महाराजु नोन द्राव॥०॥

स्वनु सुंद योनि त्रुलोर गरुनोवुय,

दय अनुनोवुय जंगि बापथ।

पॅन्डितव तु ब्रह्मनव ग्रज तुज यकबारु॥

शान्दार मेखलि महाराजु नोन द्राव॥०॥

अथि छय तुलुमूर नॉल्यु बेक्षायि जूल्यु,

बूल्यु छय ग्वरु सुंज मंग बेक्षा।

छुय कलस कनटोपु सुति क्याह शूबिदारु॥

शान्दार मेखलि महाराजु नोन द्राव॥०॥

वीद पॅर्य पॅर्य छिय कन श्रोचुनावान,

कार छय प्रारान यारुबल वस।

‘सांयिल’ लोलु सान ख्यावी फलुहारु॥

शान्दार मेखलि महाराजु नोन द्राव॥०॥





# म्याँन्य् आँही छय यिहय

(लँडकस आँही)

गछ ग्वलाबुक्य पॉट्य फ्वंल मुशकुनाव खांदान तय,  
शान बँड्यनय शांदारो म्याँन्य् आँही छय यिहय॥

गछ नवान तय बेयि फ्वलान करतु थँद्य मँज्जिल चु तय।  
दाय वँन्य्ज्यूस गाटुजारो, म्याँन्य् आँही छय यिहय॥

रुत यछुन येछ्यूनय जहानस बँर्यनय रुचर चेंय नीचनुय।  
गछ चे तरकी शूबिदारो, म्याँन्य् आँही छय यिहय॥

वव सतुक ब्योल कर्म डूरिस फल छु स्वख संतोषसुय।  
धर्म रॉछ कर रॉछदारो, म्याँन्य् आँही छय यिहय॥

फ्यूरुख सतव र्वपयव प्यठन तथ गवाह अँगनु राजु छुय।  
अधींगिनी हुंद छुख जिमुदारो, म्याँन्य् आँही छय यिहय॥

छय तसुंज प्रथ मटिदोरी, तस छु चोनुय सायि तय।  
अख अँकिस छिवु दोसदारो, म्याँन्य् आँही छय यिहय॥

मंज स्वखस द्वखस अँकिस अख रूज्युज्यव तौह नखु इखय।  
माजि बबस बुजरुकि सहारो, म्याँन्य् आँही छय यिहय॥

यथ समाजस मंज चे छिय ब्योन ब्योन फर्ज नखु तालुनिय।  
केन तु 'साँयिलुन' अख इशारो, म्याँन्य् आँही छय यिहय॥





# गछ अलाल खानो चे हा बोड आय (अलाल खानस ओही)

चानि वेरि नजरानु अँन्यमय माय,  
गछ अलालखानो चे हा बोड आय।  
पायि बडि दय कँर्यनय रुतपाय॥

गछ अलालखानो चे हा बोड आय॥०॥  
जूर्य चॉन्य नँव्युतन थदि शानु आस,  
चानि गरि स्वख तु शॉन्ती कँरिन वास।  
द्वख तु दौद्य मु व्यॉपिनय कष्टुन्य् छाय॥

गछ अलालखानो चे हा बोड आय॥०॥  
खानदानस हुरिन चानि सुत्य मान,  
क्वल तारुख छुख तु खॉर्यज्यस शान।  
ओर जुव दोर कोठ चे थदन पाय॥

गछ अलालखानो चे हा बोड आय॥०॥  
गछ चे द्वहँ ख्वतु द्वहँ हुडु हुर्यनय,  
पापरजॉयी चे ब्रोंठ ब्रोंठ छय।  
ख्वश तु ख्वशहाल रोज़ पूशिनय माय॥

गछ अलालखानो चे हा बोड आय॥०॥  
बाग चोन नँव्युतन तु फौल्यूनय पूर,  
पापन तु व्यॉज़न गँछयूतन सूर।  
यैछयूनय वाह वाह चँल्यूनय वँह्य तु वाय॥

गछ अलालखानो चे हा बोड आय॥०॥



रैन् चॉन् चार्धु शरीर लैस्यनय,  
फ्रेचर, रुचर, तय स्वख, बॅर्यनय।  
चाने व्वल—व्वल व्वतुलिनस माय॥

गछ अलालखानो चै हा बोड आय॥०॥  
धर्मचि वति लॅगिन अठकल चॉन्,  
सैजि वति रुचि कॅज कल कॅहर चॉन्।  
आँश आरामन चै पोशन पाय॥

गछ अलालखानो चै हा बोड आय॥०॥  
**‘साँयिलन्’** आँही गॅछ्यनस स्वफल,  
प्रथ मुशिकल चैय गॅछ्यनय सॅहल।  
बॅनिनय कष्टु निशि म्वकलन पाय॥  
गछ अलालखानो चै हा बोड आय॥०॥



म्याँन् आँही पूशिनय  
(टाढ्यन महरेन्यन तु महाराज़न)

प्रेखठिनय पॅज़ नीर्यनय,  
गछ म्याँन् आँही पूशिनय।  
म्याँन् रुम रुम छी यछाने॥  
गछ जिन्देगॉनी पूशिनय॥०॥

यारि यावुन मुशकिनय,  
 फोल्नय ग्वलाबुक्य् पॉट्य बाग।  
 आश कॉयिम रूज्यूनय तय॥  
 गुल तु गुलज़ार पूशिनय॥०॥

जूर्य चॉनी रूज्यूनत रुच,  
 म्वहबतुच थ्यकुवुन्य् मिसाल।  
 छुय मुबारक राजकरनस॥  
 शादमॉनी पूशिनय॥०॥

दम बदम ऑसिन ड्यकस,  
 चॉनिस फ्वलान लोलुक असुन।  
 आय हुर्यनय मायि चाने॥  
 स्वख तु सावय पूशिनय॥०॥

पूरु गॅछिनय यछ दिलुच,  
 बेयि शर तु अर्मान नीर्यनय।  
 हज़ तु हावस नीर्यनय गछ॥  
 दिल तु दिलदार पूशिनय॥०॥

दुनियिहुक्य् स्वख मीट्य दीनय,  
 बोसु कॅर्यनय शॉद्य च़ेय।  
 दॉद्य पोत हैयनय फ़कत॥  
 ओर जुव तु दोर कोठ पूशिनय॥०॥

मेचि फल्नय स्वन सपदिनय,  
 दय बख़शिनय नीचन श्वज़र॥  
 आय लॅग्यूनय रुमु रेशुन॥  
 बेयि सूंत्य् शौहज़ार पूशिनय॥०॥



जांह ति परु मतु पाँव्यनय,  
आवेजु जांह मतु थाँव्यनय।  
लानि लीख्य लीख्य थाँव्यनय हुदु॥  
कामराँनी पूशिनय॥०॥

चंदु छोन हरगिजु मु थँव्यनय,  
मालुजर थँव्यनय वोफूर।  
मुफलिसन येछनय करुन अथुरोट॥  
सतुच पछ पूशिनय॥०॥

पर्दु पूशी म्योन दय कँर्यनय,  
स्व ब्वद्ध थँव्यनय चे दाय।  
स्योद चे गँछयनय 'साँयिलन्य' आही॥  
स्व प्रकृथ पूशिनय॥०॥



नोशये छावी स्वख तु शाँदी  
(नवि न्वशि आही)

वॉरिव्यु दोर हय हुंबु रंजुनावी,  
नोशये छावी स्वख तु शाँदी।  
राजु गरु चायख राजय बाँयी॥  
नोशये छावी स्वख तु शाँदी॥०॥

नखि इखि रूज्यूनय पनुन्य इष्ट दीवी,  
 सहायतस रूज्यूनय मारख छ्वह।  
 चावु सान येछ्यनय करुन्य खानुदोरी॥  
 नोशये छावी स्वख तु शौदी॥०॥

हज तय हावस अर्मान नीर्यनय,  
 फीर्यनय रुमु रुमु अमूरयतु पय।  
 दायि तोन कॅर्यनय शूब शुबिदोरी॥  
 नोशये छावी स्वख तु शौदी॥०॥

नाख रोजि दोलु वाह वाह करन सौरी,  
 ग्वणुनय लगुनय पौरीये।  
 खिर तु खंड ख्यावुनय कम म्यवु जौरी,  
 नोशये छावी स्वख तु शौदी॥०॥

जॉम व्यन्दनय बेनि करूनय जौरी,  
 येछ्यनय करुन्य तिहुंज गमखौरीये।  
 हशि हैहरस कॅर्यजि तौब्यादोरी॥  
 नोशये छावी स्वख तु शौदी॥०॥

दुयिनुय येछ्यनय करुन्य तर्फदोरी,  
 छेन्ध करन दुयि करन चौनीये।  
 गछ शर्म रॅछनय चैय शर्मदोरी॥  
 नोशये छावी स्वख तु शौदी॥०॥

वछस कुलुफ यस तस नु लछिची नंग,  
 रुच नियथ आसि यस तस नु मंग मंग।  
 संतोष यस कोरि स्वय छे महारानी॥  
 नोशये छावी स्वख तु शौदी॥०॥



‘सायिल’ छु मुर दोरिथ दयस मंगोनी,  
 सानि वन हारि थँव्युजि स्वख जॉरी।  
 असि आयि ह्यथ दिवथ चलि लाचोरी॥  
 नोशये छावी स्वख तु शॉदी॥०॥



तनु रँछखय रतु कतुरव तु लोलो  
 (तिमन कोर्यन यिमन व्वन्य् पनुन गरु छु गछुन)

तनु रँछखय रतु कतुरव तु लोलो,  
 चोन दूर्यर क्यथु व्यतुख तु लोलो।  
 ख्वनि ललवुख मॉल्य् पेत्रव तु लोलो॥  
 चोन दूर्यर क्यथु व्यतुरव तु लोलो॥०॥

कूर्य नान्य्व रँछहख क्वछि क्वछी,  
 प्वफु मासव छायन तु ग्रायन वुछी।  
 माम मामन्य्व बेयि मेत्रव तु लोलो॥  
 चोन दूर्यर क्यथु व्यतुरव तु लोलो॥०॥

नँव्य नँव्य ज़ोर ऑसी बदलावान,  
 ख्वनि ख्वनि च़ेय ऑसी ललुनावान।  
 आय कोंछ हय पानु नेत्रव तु लोलो॥  
 चोन दूर्यर क्यथु व्यतुरव तु लोलो॥०॥

दग रछनुच दुबु वॉलिज़ छे फिरवान,  
 दूर सपदुन चोनुय छिनु ज़रुवान।



किथु यि बेनिरुय व्वन्प् प्यतुरव तु लोलो॥

चोन दूर्यर क्यथु व्यतुरव तु लोलो॥०॥

कूर्य मालिन्य् सथ गॅयि म्वहरु अंबार,

छेनु मालिनि द्यन गुजॉर्य यी छु संसार।

कोर सायि कोरि वॉरिव्य् छेत्रव तु लोलो॥

चोन दूर्यर क्यथु व्यतुरव तु लोलो॥०॥

कॅल्य् कोस्तूर्य गॅयि गित्य् वन हार्यन,

व्यसु व्यसुरेयि गिन्दि कुस छ्यपुछार्यन।

पानु मोर छुन व्यसु सॅदुख तु लोलो॥

चोन दूर्यर क्यथु व्यतुरव तु लोलो॥०॥

गॅयि सॉरी यिय वुछिथ सख गमगीन,

नम छु असान नमदार छय यि जॅमीन।

त्राहि त्राहि कोर पनु वॅथरव तु लोलो॥

चोन दूर्यर क्यथु व्यतुरव तु लोलो॥०॥

तनु कूरी ऑसखय कुंजु बरदार,

चानि रोस मा ओस यिवान ब्रुन्जिस ति वार।

अज त्रावथम गरु कुन दव तु लोलो॥

चोन दूर्यर क्यथु व्यतुरव तु लोलो॥०॥

नेरी कूरी यिनय माल्युन मशी ज़ांह,

द्वयि चोरि दोह्य ऑजि असि ह्यवान खबराह।

वनतु नतु अॅस्य् क्यथु संबलव तु लोलो॥

चोन दूर्यर क्यथु व्यतुरव तु लोलो॥०॥



तनु ऑसख माजि हुंज अख राजदार,  
 बेन्यन बायन ऑसुख अख शेहजार।  
 तिमय बेनि बाँय क्याह मॅशरन तु लोलो॥  
 चोन दूर्यर क्यथु व्यतुरव तु लोलो॥०॥

चुय ऑसुख मॉल्य् सुंज कल थावान,  
 चुय शेरान ऑसुहस चुय पॉरान।  
 तॅस्य् हय ओश वोथ जरु नेत्रव तु लोलो॥  
 चोन दूर्यर क्यथु व्यतुरव तु लोलो॥०॥

कूरू गॅयि व्वपर माल वोन 'सायिलन' शार,  
 कोरि वाल्य्न् बूजिथ लॅज अॅशिय दार।  
 वोद मेत्रव तु सुत्य शेत्रव तु लोलो॥  
 चोन दूर्यर क्यथु व्यतुरव तु लोलो॥०॥



गछि स्वनु हॉरी टूठ्यनय दय  
 (पनुनि कोरि यस खांदर तस)

इयकु बॅड आसतय कॅर्यनय जय,  
 गछि स्वनु कूरी टूठ्यनय दय।  
 रक्षा चे पानु रक्षिपाल कॅर्यनय॥  
 गछि स्वनु कूरी टूठ्यनय दय॥०॥

यावुनस सूंत्य् शोहजार पूशिनय,  
छावुनस चै गुल तु गुलज़ार ऑस्यूनय।  
अछु रछु मसवलु छेंछु कॅर्यनय॥  
गछि स्वन कूरी टूट्यूनय दय॥०॥

रुत साथ ह्योत तु बेयि फ्रूच नीर्यनय,  
जूर्य चॉन्प् नॅव्यूनय तु ड्यकु फोल्पूनय।  
असु वुन्य गिन्दु वुन्प् जिंदु थॅव्यूनय॥  
गछि स्वनु कूरी टूट्यूनय दय॥०॥

समसॉर्य स्वख च़ेय मीट्य दीनय,  
राजुत करनस छु छायख च़ेय,  
दान तोत तु बर वोथ वाँसि रूज़्यनय॥  
गछि स्वनु कूरी टूट्यूनय दय॥०॥

गछ गरस तु बारस शूब यीनय,  
रुति व्यवहारु रुत्य् फल दीनय।  
अथु छोन चंदु छोन ज़ांह मु थॅव्यूनय॥  
गछि स्वनु कूरी टूट्यूनय दय॥०॥

खोशी ख्वशहॉली स्वख बॅर्यनय,  
द्वखु गटु हर हमेशि दूर हैयनन।  
ओर जुव तु दोर कोठ बॅर्यनय प्रय॥  
गछि स्वनु कूरी टूट्यूनय दय॥०॥

खांदानुक नाव नेशनॉव्युजे,  
नीचन श्वज़र चुय पानु बॅर्यजे।  
व्वथु वुन तु बेहुवुन कॅर्यजि दयिदय॥  
गछि स्वनु कूरी टूट्यूनय दय॥०॥



‘सौरिलुन्यु’ आही स्वफल गॅछ्यनय,  
 कूरी हज तु हावन नीर्य नय।  
 आश पूरु गॅछ्यनय बाश हर्यनय॥  
 गछि स्वनु कूरी दूठ्यनय दय॥०॥



गछ चन्दन दारस शोहजार कर  
 (नवि लरि अचुनस प्यठ)

स्वखुसुय लोजु कर इयकुनिस दारस,  
 गछ चन्दन दारस शोहजार कर।  
 येछ्यनय हज तुलुन यथ स्वर्गु दारस॥  
 गछ चन्दन दारस शोहजार कर॥०॥

अथुवुय अथुरोट करुन येछ्यनय,  
 म्वहताजन हाजथ कडुन येछ्यनय।  
 गुल वारु फोल्यनय लोलु गुलजारस॥  
 गछ चन्दन दारस शोहजार कर॥०॥

स्वखु शान्ती हुंद रोजि दर्बार,  
 गरि गरि चानि गरि सूत्यू शोहजार।  
 छेन्ध्य करुन्य येछ्यनय स्वखु संसारस॥  
 गछ चन्दन दारस शोहजार कर॥०॥

हवुनन तु यॅगन्यन मु थॅव्यनय छ्यन,  
ओलुवुन तु डोलुवुन थॅव्यनय अन्न।  
राजु बाय आसं मंज राजु दर्बारस॥  
गछ चन्दन दारस शोहजार कर॥०॥

बर वोथ तु दान तोत वाँसि रूज्यनय,  
पनुनि डेरु सेर कॅरिथ शाद थॅव्यनय।  
दय म्योन ग्वड बॅर्यनय मॅछ्यजारस॥  
गछ चन्दन दारस शोहजार कर॥०॥

नीचन थॅव्यनय स्यजर श्वजर,  
शाघन तु ऑशन कॅर्यनय हर्यर।  
रूग दौद्य कौसिनय दुस परिवारस॥  
गछ चन्दन दारस शोहजार कर॥०॥

चानि डेडि अँच्यथुय गम गछन दूर,  
प्रेयमु सन्तूर वजि दजि कोफूर।  
आनन्द बॅव्यनय लोलु व्यवहारस॥  
गछ चन्दन दारस शोहजार कर॥०॥

‘साँयिल’ छुय मंगान बडि दर्बारय,  
आही करान छुय वारुकारय।  
ख्वश तु ख्वशहाल रोज मंज गरुबारस॥  
गछ चन्दन दारस शोहजार कर॥०॥





# छावि कर्मुन महल खानु बॉलिये

(नवि लरि अचुनस प्यठ)

ह्योत तु फ्रूच नीर्यनय ठिकानु बॉलिये,

छावि कर्मुन महल खानु बॉलिये।

यँछ्यनय शादि शॉद्ययानु बॉलिये॥

छावि कर्मुन महल खानु बॉलिये॥०॥

द्वहदिश सत्संग तु गीता पाठ,

चॉनिस द्वारस पूजा तु पाठ।

हुम यँगुन्य रूज्यनय चलानु बॉलिये॥

छावि कर्मुन महल खानु बॉलिये॥०॥

चानि बरु नेरि यिनु छोर व्वमेदवार,

वथि दिलु करुस आदर सत्कार।

पँछ्य रूपु व्यंदुन भगवानु बॉलिये॥

छावि कर्मुन महल खानु बॉलिये॥०॥

यँछ्यतनय करनी पँछ्य पूजा,

दूट्य नय दय नीर्यनय तमुना।

यश ग्यवान नेरन मेहमानु बॉलिये॥

छावि कर्मुन महल खानु बॉलिये॥०॥

संसॉर्य स्वख च़ेय ऑस्यनय याफ,

रूग तय मर्ज कौस्यनय पाप—शाप।

वुम्बरि वाँसि आसि स्वखु सानु बॉलिये॥

छावि कर्मुन महल खानु बॉलिये॥०॥

फोल्यानय बाग चोन इयकुनुय तीज,  
 थँव्यूनय वॉफिर प्रथ अख चीज।  
 पूरु रोज़ि सोरि सामानु बॉलिये॥  
 छावि कर्मुन महल खानु बॉलिये॥०॥

दयिसुन्द अनुग्रेह रूज्यनय पूर,  
 बद बलाय रद बलाय गँछयूनय दूर।  
 सपदिनय बेयि चे कल्याणु बॉलिये॥  
 छावि कर्मुन महल खानु बॉलिये॥०॥

आँही 'साँयिलन' येछि पछि कँर,  
 फोल्यानय पोशि कुज बेयि पोशिथँर।  
 नेशनाव सोरुय खादानु बॉलिये॥  
 छावि कर्मुन महल खानु बॉलिये॥०॥



फ्रूच नीर्यनय रंगु महलखानय  
 (कोरि नवि लरि अचुनस प्यठ्)

अन्द वॉत्यूनय स्वख तु शॉद्ययानय,  
 फ्रूच नीर्यनय रंगु मँहल खानय।  
 रुति बागि सूज़िनय रुत बानय॥  
 फ्रूच नीर्यनय रंगु मँहल खानय॥०॥



वथि दिलु युस दियि म्वहताजनुय,  
तस हर विजि पूरन तु पोशनुय।

येछि युस परस गरु तस बरानय॥

फ्रूच नीर्यनय रंगु मँहल खानय॥०॥

यथ लगि खूनु पाँसु बेयि शोद श्रूच धन,

तथ गरस मंज पानु लक्ष्मी छे रोजन।

तति छेनु कमी जाह रोजानय॥

फ्रूच नीर्यनय रंगु मँहल खानय॥०॥

हवुनन, हुमन, यँगन्यून बॅर्यजि प्रय,

दय अदु टोठी सोजी सुय वय।

मंगुवुनिस ओजि हलमस बरानय॥

फ्रूच नीर्यनय रंगु मँहल खानय॥०॥

सत्संगनुय हुंज प्रवरथ पुशिनय,

पर ह्यथ करनस च़ेय मन पँच्यनय।

सुबु शाम दयि नाव रोज स्वरानय॥

फ्रूच नीर्यनय रंगु मँहल खानय॥०॥

रुत्य रुत्य कार येथ्य लरिमंज चुय कर,

गुल तु गुलजार फुलये शॉही कर।

सूत्य् शोहजार रोजि छावानय॥

फ्रूच नीर्यनय रंगु मँहल खानय॥०॥

कूफ संकट तु व्याँज अति चँल्यनय दूर,

दूप दीपु काँठगन ज़ाल मुशकि कोफूर।

ठोकुर कुठि ओंजि गोड़ चु दिवानय ॥

फ्रूच नीर्यनय रंगु मँहल खानय ॥० ॥

फोल्नय डयकुनुय तीज नँव्यनय,

इष्ट दीवी पनुनुय सायि कँर्यनय ।

स्वखु सान रोजि सोरि सामानय ॥

फ्रूच नीर्यनय रंगु मँहल खानय ॥० ॥

बस स्यजरस पजरस लोग रूज्यजे,

अहंकार बेयि घुमण्ड मनुसॉव्यजे ।

नेमिनि क्रमिनि ओंजि कूर्य रोजानय ॥

फ्रूच नीर्यनय रंगु मँहल खानय ॥० ॥

हनु वनु दियनय बेयि नीर्यनय शर,

दान तोत रूज्यनय तय बेयि वोथ बर ।

‘सायिल’ हु बस यिय तस मंगानय ॥

फ्रूच नीर्यनय रंगु मँहल खानय ॥० ॥



टाठि मालिनि माय चॉन्य ह्यथ द्रायिसय

(कूर मालिन्यून इजाजथ मंगान मंगान वनान)

यि ओही छे म्यानि कोरि श्रीमती रेणुका पिशन (वली) सुंजि

यछा पूर करनस प्यठ लीछमुच तँस्य हु यि म्योन गुलि म्युठ ।

‘सायिल’



म्यानि मालिनि व्वंदि बो माय चॉन्य ह्यथ द्रायिसय,  
टाठि मालिनि वछिसुय मंज सथ शिहिज ह्यथ द्रायिसय।  
दारि किन्य् या पॅतिमि बरु किन्य् अज बु वॉर्युव द्रायिसय॥  
टाठि मालिनि वछिसुय मंज सथ शिहिज ह्यथ द्रायिसय॥

चॉन्य् सथ पोशिन्य् गछ्यम मे चोन श्रेह छुम यथ दिलस,  
चोन अमार रोजि द्वहदिश यछ बरान म्याॅनिस दिलस।  
लोल चोनुय वतुहावुख युस बु सुत्य् ह्यथ द्रायिसय॥  
टाठि मालिनि वछिसुय मंज सथ शिहिज ह्यथ द्रायिसय॥

मॉल्य् सुंद चुक, माजि हुंद चुक याद छुम सुय क्यथु मशम,  
जुव वंदुन, पालुन तु प्यतरुन, नाज बोजुन्य् क्यथु मशम।  
अज तिहुंज आॅही तु आॅशिर्वाद हदि ह्यथ द्रायिसय॥  
टाठि मालिनि वछिसुय मंज सथ शिहिज ह्यथ द्रायिसय॥

मायि हचु म्यानि बेनि जिगरितु बॉय गमखार दिलजिगर,  
म्याॅन्य् जिठ्य जिछि वारु रुजिन सुत्य् छुम तिहुंदुय जिछर।  
स्वय बु बॅड हिश लॉकरन बेयि दाज नॅछ्य ह्यथ द्रायिसय॥  
टाठि मालिनि वछिसुय मंज सथ शिहिज ह्यथ द्रायिसय॥

यिनु मे मॅशरिव म्योन त्वकृचार याद विजि विजि पॉव्युज्य्व,  
म्यानि कोठ्य ख्वखजि तु बेयि गिंदु बाशि च्यतुसुय थॉव्युज्य्व।  
जन्म ह्यनु पतु अज बु त्वहि ह्यथ व्वन्य् इजाजथ द्रायिसय॥  
टाठि मालिनि वछिसुय मंज सथ शिहिज ह्यथ द्रायिसय॥



छस मंगान ओञ्जा बु मालिन्य् ओशनावन तय अंगन,  
 कूर तुहुंजुय द्रायि गर कुन गुल्य् गॅन्डिथ ओही मंगान।  
 म्यानि मालिनि रोज फवलवुन ती यछा ह्यथ द्रायिसय॥  
 टाठि मालिनि वछिसुय मंज सथ शिहिज ह्यथ द्रायिसय॥

चानि ओही सुत्य् अजताम कॅर मै ओही मालिनिस,  
 दारि बॅर्य द्रायस नु हरगिज अदु रॅछिम नस मालिनिस।  
 'सॅयिलन्य्' सौरुय नॅसीहत हलि गॅन्डिथ अज द्रायिसय॥  
 टाठि मालिनि वछिसुय मंज सथ शिहिज ह्यथ द्रायिसय॥



अज हय कूर्य गर पनुन गछुनुय छुय  
 (कोरि वॉर्युव गछुनस प्यट्)

ख्वनि ख्वनि ल्वलि ल्वलि तनु ओस करुनुय,  
 अज हय कूर्य गर पनुन गछुनुय छुय।  
 जुव वंदुन रथ वंदुन व्वथुवुन तु बेहॅवुनुय॥

अज हय कूर्य गर पनुन गछुनुय छुय॥०॥

येमि दारु नीरिथ तथ दारस अचुनुय,  
 सुय चोन मँजिल तु अन्द वॉत्यूनय।

पजि गव सुय पनुन तु लोल तॅथ्य् बरुनुय॥

अज हय कूर्य गरु पनुन गछुनुय छुय॥०॥



पनुन्यन वॉर्यव्यन हैच तु फ़ुच नेरुनुय,  
नेशिनावुन तमि क्वलकुय नाव।

सुय हबी गव गाटुजार आसुवुनुय॥

अज हय कूर्य गरु पनुन गछुनुय छुय॥०॥

पनुने चरित्रुक रॉछदर बननुय,

दारि बॉर्य नेरुन छुनु शायान।

शूब तय शर्म गछि दय पनुन रछिनुय॥

अज हय कूर्य गरु पनुन गछुनुय छुय॥०॥

पनुनुय बॉच गछि ईशर व्यन्दुनुय,

य्वसु ति करि तॅस्य वनव पतिव्रता व्रय।

तस छु परमीश्वर सायि करुवुनुय॥

अज हय कूर्य गरु पनुन गछुनुय छुय॥०॥

जिद्व्यन हुंद ऑशिर्वाद गछि जेनुनुय,

धर्मचि कामि मेलि कर्मण फल।

यिय दियि दय तथ असत्वथ करुनुय॥

अज हय कूर्य गरु पनुन गछुनुय छुय॥०॥

संतोषस छु रुत फल नेरुवुनुय,

तंबुलुन लालसा मन थवान अशांत।

दय गछि पनुने कर्म सोजुनुय॥

अज हय कूर्य गरु पनुन गछुनुय छुय॥०॥

पनुने डेरु गछि दय सेर करुनुय,

म्वहताज तु आवेजु थवुनुय नु जांह।



रुत करि रुत गछि विजि विजि स्वरुनुय ॥

अज हय कूर्य गरु पनुन गछनुय छुय ॥० ॥

जिन्दगी येछ्य तनय आनन्द करुनुय,  
नव्यतनय डयकुन तीज फोल्यातनय बाग।  
प्रथ काँसि येछ्यतनय अथु रोट करुनुय ॥

अज हय कूर्य गरु पनुन गछनुय छुय ॥० ॥

स्वख तु शॉद्य ओलुवुन बेयि डोलुवुनुय,  
थव्यनय दय म्योन येछ्यनय करुन राज।

‘साँयिल’ छु यिहय आँही करुवुनुय ॥

अज हय कूर्य गरु पनुन गछनुय छुय ॥० ॥



बरतु हलमस आँहियि साने

(लँङकी र्वखसथ करनस प्यठ)

असान गिंदान नेर दारु मंजु साने,

बर तु हलमस आँहियि साने।

गव हय लूठ ज़न नेरुन चाने ॥

बर तु हलमस आँहियि साने ॥० ॥

जिदयव वोनमुत छु वुगुवोन्य माल्युन,  
वाठ काँसि वुम्बरि छुनु दिवान माल्युन।  
गछ चै पूर्यनय पनुनि कर्मलाने ॥

बर तु हलमस आँहियि साने ॥० ॥



लोऽऽ स्वखुसय करतु आनन्दय,  
आँश आराम वाँत्य नय अन्दय।  
ओश त्रावुन बनि बे माने॥  
बर तु हलमस आँहियि साने॥०॥

त्यूत राहत येछ्यनय भगवान,  
ओलुवुन तय डोलुवुन सामान।  
युथनु म्वहताज रोज़ख च़ु दाने॥  
बर तु हलमस आँहियि साने॥०॥

इयकु नैव्यनय अर्मान नीर्यनय,  
रंगु रंगय गुलुज़ार फोलियनय।  
नैविन खांदान अमि फुलयि चाने॥  
बर त हलमस आँहियि साने॥०॥

सोन दाज छुय धर्मच शिक्षा,  
गँहनु कनि छय दिचुमुच़ विद्या।  
स्वय छे पोशिवुन्य गछि नु आनि माने॥  
बर तु हलमस आँहियि साने॥०॥

कूर शैहलथ छे मॉलिस तु माजे,  
कल छे रोज़ान तस कालु काजे।  
बस यिहुंजुय स्वय कंदुर ज़ाने॥  
बर तु हलमस आँहियि साने॥०॥

वाँरिव्य बाँच च़ुय रंजुनाँव्यजे,  
बेयि ज़िदयन हुंज आँही प्राँव्यजे।

अटु प्रावख स्वख तु शादमाने॥

बर तु हलमस ऑहियि साने॥०॥

हश ह्युहुर गव बब तय मॉजी,

द्रुय तु जॉमु गयि बॉय बेनि बॉजी।

अटु करुनय चाने चाने॥

बर तु हलमस ऑहियि साने॥०॥

स्वख तु सावय बर्य नय लोलुय,

त्युथ बॅनिनय शांत माहोलुय।

शॉद्य 'सॉयिल' लीख्यनस लाने॥

बर तु हलमस ऑहियि साने॥०॥



चेटि बतु थपल बतु

(थोद वॅथिथ ख्यनस जॅट)

आज़रथ माज़रथ छु सोन दस्तूर,

चेटि बतु थपल बतु छुनु मन्ज़ूर।

पॅछ्य पूज़ा सॉन्य ऑस मशहूर॥

चेटि बतु थपल बतु छुनु मन्ज़ूर॥०॥

बतु बोछ छुनु येति कांह आसान,

मायि बोछ मायि किन्ऩु हुबु छु लारान।

लोलु सबु छुय यिवान ऑस्युतन दूर॥

चेटि बतु थपल बतु छुनु मन्ज़ूर॥०॥



पेछय पूजायि ख्वतु धर्माह छा।  
 पलजुनु ख्वतु बोड कर्माह छा।  
 सीवायि हुंद मोक् गोछ छुन पूर॥  
 चेटि बतु थपल बतु छुनु मन्जूर॥०॥

युस यिवान सालु छुय लॉजिमदार,  
 तस नु कांह प्रछनस, त्युथ नु व्यावहार।  
 तस छु बासान ज़न छु आमुत चूर॥  
 चेटि बतु थपल बतु छुनु मन्जूर॥०॥

ऑशनाव रुशनाव रावान हिव्यु,  
 व्वपर तु दूरि दराज़ु बासान हिव्यु।  
 अख अँकिस सुत्य ब्युहुन नु समागम पूर॥  
 चेटि बतु थपल बतु छुनु मन्जूर॥०॥

थपि थपि चलु लारि ख्योन क्याह साल,  
 सबि बेहनस छय व्वनय् यिवान गाल।  
 अथु स्वरशवुन्यु त्रोव असि दूर॥  
 चेटि बतु थपल बतु छुनु मन्जूर॥०॥

लॉजिमदार थदि बेहनावुन्यु,  
 येछि पछि तिम ख्यावुन्य चावुन्य।  
 धर्मुवान येम्य सबि कर्मु ख्युन शूर॥  
 चेटि बतु थपल बतु छुनु मन्जूर॥०॥

दमुओलवन, नदुर्य यखनि चमचि कथ बकार,  
 स्वाद कति तथ यथनु अथु व्यस्तार।

मॅर्यद्यादम्यून यियि नु यड़ बर पूर॥

चेटि बतु थपल बतु छुनु मन्ज़ूर॥०॥

यि छु धर्म नियमस विरुद्ध र्यवाज,

तेलि रुत छु होटल तथ छेनु लाज।

असि छा स्व सूरथ धनु त्युथ वोफूर॥

चेटि बतु थपल बतु छुनु मन्ज़ूर॥०॥

छोट गव मोट कॅरिव कम इसराफ,

शरणरथियन असि कॅर्यतव माफ।

गॅरीबन हुंद व्वश यिनु करि सूर॥

चेटि बतु थपल बतु छुनु मन्ज़ूर॥०॥

नहकु तेह छोन यश नेरि मा सोर,

रोज़ुन्य पनुपॉर तु वांगुज वोर।

देखा दीखियि ओन असि ग्यूर॥

चेटि बतु थपल बतु छुनु मन्ज़ूर॥०॥

तहरि फॅकीरण तॅहर अथन क्यथ,

कागज़ तिलिमा पलेटा ह्यथ।

दवु दव तु थपु थफ, दकु दख पूर॥

चेटि बतु थपल बतु छुनु मन्ज़ूर॥०॥

काकुन्य देद्य! लालु सॉब! थपल बतु खे,

ह्यसु रोज़, दोर रोज़ पथ मसॉ बेह।

ज़ेरि सुत्य दमोलुव वोत कूत दूर॥

चेटि बतु थपल बतु छुनु मन्ज़ूर॥०॥



नदरी मोकुनस द्राव येलि कश,  
डिम्पलि आव फैशनी स्यूटस फश।  
शुर्यव कोर असुनाह प्योस रसुटूर॥  
चेटि बतु थपल बतु छुनु मन्जूर॥०॥

मँ कॅरिव फरहंगिनय सृत्य् मान,  
'साँयिल' क्याह वनान छिवु चेनान।  
स्व व्यचारु दुपस छे परम्परा जूर॥  
चेटि बतु थपल बतु छुनु मन्जूर॥०॥



## व्यनती

(चलन्त तर्जस प्यठ)

तलुसॉ रूज्युतव व्वन्य् मिलुचारस मंज,  
हे स्वख छुवु बस समुचारस मंज।  
यखलासस तु बाँय चारस मंज॥  
हे स्वख छुवु बस समुचारस मंज॥०॥

पोत पोत आँबथ गॉबथ करनस,  
कुठ कडुनस तु ह्यडुनस, ब्रँड्य् कडुनस।  
छेनु दुयी कुहुय गाटु नारस मंज॥  
हे स्वख छुवु बस समुचारस मंज॥०॥

हे गॉमियन शहरियन मंज छा ब्यून,  
हे जॉचन जॉचन मंज छा ब्यून।

छिवु बॉच हिवी परिवारस मंज॥

हे स्वख छुवु बस समुचारस मंज॥०॥

मतु रूज्यतव अख अँक्यसुय खहनस,  
नखु फेक्य छिवु पोत हैयतव ज़लुनस।  
रुत फल छा ज़ांह नाकारस मंज॥

हे स्वख छुवु बस समुचारस मंज॥०॥

धनु दौलत पोशिवुन्य छिनु काँसे,  
लरि जायि महलखानु रूदी नु काँसे।

क्याह छु रोज़वुन यथ संसारस मंज॥

हे स्वख छुवु बस समुचारस मंज॥०॥

अँस्य् ब्वहरानस मंज ह्यनु आमुत्य,  
गुरु बार त्रॉविथ अथुछेन्य् द्रामुत्य्।  
परु छेन्य् गॉमुत्य गुरु बारस मंज॥

हे स्वख छुवु बस समुचारस मंज॥०॥

तीत्य् काँत्याह छि अँस्य् ब्योन ब्योन रोज़व,  
अख अँकिस वनव, अख अँक्ससुंद बोज़व।

यछ पछ बडि लोलु व्यवहारस मंज॥

हे स्वख छुवु बस समुचारस मंज॥०॥

अथु वासस हिशारस मंज छुवु बल,  
स्यज़रु पज़रु तु कुनिरुच कँर्यतव कल।  
अदु हुदु बडि असि दरबारस मंज॥  
हे स्वख छुवु बस समुचारस मंज॥०॥



मतु यज़तस तु मानस अँन्युतव छा़य,  
 तमी बापथ सॉर्यसुय लथ दिथ द्राय।  
 यिनु बदलिव रछ ति अनुहारस मंज़॥  
 हे स्वख छुवु बस समुचारस मंज़॥०॥

यछ बॅर्यतव श्वदि मनु तस हरुसुय,  
 यिकुवटु लगि तार असि भ्सवुसरुसुय।  
 छुनु कांह आनन्द दोगन्यारस मंज़॥  
 हे स्वख छुवु बस समुचारस मंज़॥०॥

यिथि मोकु पेयिव सॉ पायस तोह्य,  
 सँनिव पानय पनुनिस न्यायस तोह्य।  
 छुवु प्रज़लि प्रकाश अंधकारस मंज़॥  
 हे स्वख छुवु बस समुचारस मंज़॥०॥

पानु वॉन्य् अख अँक्य् सुंज़ सथ रँछतव,  
 ड्यकु मुचरिथ स्वखु द्वखुच कथ कॅर्यतव।  
 अदु बासि प्रकाश अंधकारस मंज़॥  
 हे स्वख छुवु बस समुचारस मंज़॥०॥

कँड्युतव मतु क्वदु तय न्वकसुय यॉत्पु,  
 हैछतव वथ दिन्यु बेयि स्यज़रुय यॉत्पु।  
 म्यूठ मेछर बॅरिव गुफतारस मंज़॥  
 हे स्वख छुवु बस समुचारस मंज़॥०॥

तोह्य मान मतु कॅर्यतव इसराफ़स,  
 पोत हैयतव हैतिस दितिस दाजस।  
 हावु बावस तु यशि बापारस मंज़॥  
 हे स्वख छुवु बस समुचारस मंज़॥०॥



हे पायस पेयतव सोम कॅर्यतव,  
 बेयि स्यज़रस पज़रस लय बॅर्यतव।  
 तेलि सपदिव रुतिस शुमारस मंज़॥  
 हे स्वख छुवु बस समुचारस मंज़॥०॥  
 यि छु नोजुक मौकु तु वेलु वुन्यक्कन,  
 सेज़ि कथि 'सॉयिलुनि' तोह्य थॅव्युतव कन।  
 नस रॅछतव तोह्य पर दारस मंज़॥  
 हे स्वख छुवु बस समुचारस मंज़॥०॥



## र्यदुके बायि म्यानि दय रॅछिनय (पनुनिस बाँयिस)

रगुनुय दग तय रतुसुय छे र्यय,  
 र्यदु के बायि म्यानि दय रॅछिनय।  
 अरिजुव दरि क्वठि वारु थॅव्युनय॥  
 र्यदु के बायि म्यानि दय रॅछिनय॥०॥  
 यिकुवटु माजि रॅछ्य फॅर्यसुय तल,  
 फॅर्य फाह दिनुची ऑस थवान कल।  
 दॅल्यसुय तल रॅटिथ छटि कॅड्यनय॥  
 र्यदु के बायि म्यानि दय रॅछिनय॥०॥  
 अॅक्यसुय क्वछि मंज़ पालुनु-आय,  
 अकी थनु बारुन्यु जन्मस आय।



अख पथ अख ब्रौठ प्यतुराव्यनय ॥

र्यदु के बायि म्यानि दय रँछिनय ॥० ॥

कुनिसुय वुरनिस वथरुनिस मंज,

नालुमोत कँरिथ करान श्वगंनुक संज।

अकी बानु मंजु ख्यन तमि ख्याँव्यनय ॥

र्यदु के बायि म्यानि दय रँछिनय ॥० ॥

द्वनुवुन्य सुवान कपटान ओस काख,

कुनी थानु ओस अनान ह्युव प्वशाख।

शिशर गोर लागान युथनु खोचुनय ॥

र्यदु के बायि म्यानि दय रँछिनय ॥० ॥

मॉल्य् माजि मा सॉ जु अँछ करिनय,

बबस माजि हथ ऑस्यतन फर्क माछय।

आय काँछान ऑस्य् सुबु शामय ॥

र्यदु के बायि म्यानि दय रँछिनय ॥० ॥

डँब्य् रूपु हज तय हवस नीर्यनय,

गुल तय बैयि गुलजार फोल्यानय।

शुर्य बाँच पलजिनय बैयि नँव्यनय ॥

र्यदु के बायि म्यानि दय रँछिनय ॥० ॥

नाव चोन येलि नेरि ब्वकु हुनुनम,

चानि श्वहरँच किन्य् शानु व्वगुनुनम।

अदु यियि खांदान नेशनावनय ॥

र्यदु के बायि म्यानि दय रँछिनय ॥० ॥



चानी तरकियि नेर्यम शर,  
शुर्य लसन अदु वोथ रोज़ि असि बर।

लाचोरी छेनु काँसि रोज़ नय॥

र्यदु के बायि म्यानि दय रँछिनय॥०॥

चेति सख श्रेह तय चुक म्योनुय,  
कुंस्यन हुंद ज़िठ्यन गछि थवोनुय।

यिनु ज़ाह मँशरख अँछ फेरुनय॥

र्यदु के बायि म्यानि दय रँछिनय॥०॥

‘साँयिलु’ कर्तव्य गछ पालोनी,

स्वय छे दानोयी रुच नियथ थव।

नियचन मोज़ूर्य चे रुच नीर्यनय॥

र्यदु के बायि म्यानि दय रँछिनय॥०॥

यिनु ल्वकटिस दिल फुटरावख,

नवि पुयि मंज यिनु फास त्रावख।

पशतावक युथनु तिम दूरुनय॥

र्यदु के बायि म्यानि दय रँछिनय॥०॥

ल्वकट्यन पज़िथवुन्य ज़िठ्यन हुंज कल,

ताँबियादार रोज़ कर मु गांगल।

रुतिनुय कारन मशवरु दिनय॥

र्यदु के बायि म्यानि दय रँछिनय॥०॥

अख अँक्यु सुंज कल येलि थँव्यवुय,

बँड्य येलि नु त्रावन खता नु शुरिनय।



संसार छु ज्युठ अथ छुमा छ्यनुय॥

र्यदु के बायि म्यानि दय रँछिनय॥०॥

युस नु ज्युठ कुन्स्य सुंद ज्ञानि यजथ।

कूस कति हेछि करि सुय कांह मदथ।

यिथु पाँठ्य करनस लूख ह्यडुनय॥

र्यदु के बायि म्यानि दय रँछिनय॥०॥

शुर्यनुय थी येलि बोय पथ त्रोव,

शुर्यव ह्योछ ती तय पानु प्रँखटोव।

पतु केँह नु नेरान गुल्य मूरुनय॥

र्यदु के बायि म्यानि दय रँछिनय॥०॥

बाँयिस बोयी दुश्मन छुय,

आँखरस सुय तस पुशि पनाह छुय।

अवु किन्स्य नेरि क्याह बिगरावुनय॥

र्यदु के बायि म्यानि दय रँछिनय॥०॥

नीचन छय मोजूर्य रुच नियथ थाव,

‘साँयिलो’ नखु फ्योक बोय प्रजुनाव।

अथुवास मिलु चारु दिल छि फवलनुय॥

र्यदु के बायि म्यानि दय रँछिनय॥०॥





बेनि म्यानि इयकुनुय तीज नॅविन!

(बेनि किच आही)

स्वख तु शाँन्ती पादन मीढ्य दियिन।

बेनि म्यानि इयकुनुय तीज नॅविन।

सगु अमर्यतु तस गुलजार फोलिन॥

बेनि म्यानि इयकुनुय तीज नॅविन॥०॥

तस छल छिदुर जांह रछ मु व्यापिन,

प्रकरँच तसुंजि कांह मल मु आँसिन।

यिनु रोच्यस हुथ युथ श्वद सपनिन॥

बेनि म्यानि इयकुनुय तीज नॅविन॥०॥

रुम म्याँन्त् तस थदि थोद आय काँछिन,

दयि स्मरनि हुंज तस माय व्वपुदिन।

संसॉर्य स्वखन मालय मु बॅरिन॥

बेनि म्यानि इयकुनुय तीज नॅविन॥०॥

जैवि तसुंदे म्वखु रुत रुत नीरिन,

कन क्षणु क्षणु तस स्व शब्द यॉत्त्य बूजिन।

अथु अँमिसुंदि श्वब कर्म करनु यियिन॥

बेनि म्यानि इयकुनुय तीज नॅविन॥०॥

दीनन आँदीनन अथुरोट कॅरिन,

म्वहताजन, मंगुवुन्यून हलम बॅरिन।

वछि वॉलिंजि धर्मस गॅजगह कॅरिन॥

बेनि म्यानि इयकुनुय तीज नॅविन॥०॥



हुम यज्ञ तु रुत्य रुत्य कार कॅरिन,  
बे वॅसीलन हुंज मददगार बॅनिन।

हुव पनुन परुद विजि विजि सौरिन॥

बेनि म्यानि ड्यकुनुय तीज नॅविन॥०॥

मनु कामनायि तॅम्य्सुय पूरु सपदिन,

ग्वरु चरणन तनुमनु शरण रूजिन।

ग्वरु दामनस थफ कॅरिथप स्यद सपदिन।

बेनि म्यानि ड्यकुनुय तीज नॅविन॥०॥

दिलि ऑयीनस तस मु ग्राय लॅगिन,

अॅछनुय तस मायायि छांफ चॅलिन।

मोह तु लूब तस जांह नखु मु यियिन॥

बेनि म्यानि ड्यकुनुय तीज नॅविन॥०॥

छम पॅज जितिन्य ज़ोतान रूजिन,

रेश मालिनिच शान बुलन्द थॉविन।

गरु खांदानस स्वय बॅड शूब अॅनिन॥

बेनि म्यानि ड्यकुनुय तीज नॅविन॥०॥

आमुच छे दीवी मनशि मॅर्य ज़न,

सथ भाव तु सथ व्यचार वॅनिन।

प्रथ कुनि रहस्य सनिरस सॅनिन॥

बेनि म्यानि ड्यकुनुय तीज नॅविन॥०॥

श्वद् ब्वद् अॅमिस व्यकार लॅबिन,

मन डंजि तु अठकल थ्यर बॅनिन।

जॉव्यजार तु न्वकतय बदि कॅडिन॥

बेनि म्यानि ड्यकुनुय तीज नॅविन॥०॥

‘बिम्बु’ म्यान् बनि थ्यकुवुन्य बनिन,  
 बाँय बारन्यून फ्रेचर नोन दियिन।  
 जेवि जेवि खँसिन साँरी वनिन॥  
 बेनि म्यानि ड्यकुनुय तीज नँविन॥०॥

छम दत्तात्रिया क्वलुच कौलु बेनिहन,  
 भागि आयस रैणा स्व पात्रुहन।

द्वनवुन्य छु म्युल कोरमुत दयन॥

बेनि म्यानि ड्यकुनुय तीज नँविन॥०॥

बेनि बाँय सथ पोछर लँबिन,

‘साँयिलु’ छे बेनि थँन्य आसुवुन्य।

परमु पद लँबिन यश नाव लँबिन॥

बेनि म्यानि ड्यकुनुय तीज नँविन॥०॥



कर्म लीखाये जय जयकार

(पनुनि अर्धांगिनी)

यनु असि म्युल गव नखु अँस्य् आसे,

कर्म लीखाये जय जयकार।

दयि सुंजि यछायि टेकिनि रल्याये॥

कर्म लीखाये जय जयकार॥०॥

मन छुमं प्रसन्न रूढ्य वाँसि अकि आये,

स्यजरस तु पजरस सुत्थ थोव ख्वय।



अर्धांगिनी म्याँन् पतिव्रता द्राये ॥

कर्म लीखाये जय जयकार ॥० ॥

यनु असि लँगुन कोर दिल रल्याये,

नखु नखु आये अख अँकिस।

मे बोरुस लोल तय तमि बँर माये ॥

कर्म लीखाये जय जयकार ॥० ॥

प्रथ स्वखस तय द्वखस द्युतनम साथ,

कल फिक्र म्याँन् थॉवुन द्वह राथ।

प्रथ विजि छय पकान म्यानी राये ॥

कर्म लीखाये जय जयकार ॥० ॥

रेश मालिनिच रेश कन्या द्राये,

सतु वॉर्यव्युक नेशिनोवुन नाव।

नेमनि क्रॅम्यानि रूजिथ ड्यकु बँड द्राये ॥

कर्म लीखाये जय जयकार ॥० ॥

धर्मच कर्मच कल अमि कँर,

श्रूचिस तय शोदिस लय अमि बँर।

छ्वपि द्वपि रूज दारि बॅर्य मा द्राये ॥

कर्म लीखाये जय जयकार ॥० ॥

कर्तव्य पूरु कँरिन यनु सोन आये,

बेनि रूपु बेनि द्रायि माजि रूपु मॉज।

डॅब्ब्य रूपु फोजमुच बँड मॉज द्राये ॥

कर्म लीखाये जय जयकार ॥० ॥

शोज बोज द्रायि छल छिदरि रूज दूर,  
 अँम्य् योछ ह्युव परस तु पानस पूर।  
 जिठिनय आयि करान सीवाये॥  
 कर्म लीखाये जय जयकार॥०॥

शर तय अर्मान नीर्यनस सौर्य,  
 वॉल्यनस शारिका पापुन्य् बौर्य।  
 कॅर्यनस विजि विजि रुत व्वपाये॥  
 कर्म लीखाये जय जयकार॥०॥

शुर्य बाँच न्वशि नेचिव्य् छिस सीवाये,  
 कुन्य् तय हिश नजर रुच नियथ छस।  
 बखशिनस दय यजथ बेयि थँज जाये॥  
 कर्म लीखाये जय जयकार॥०॥

गर गृहस्थ छय करान रुति अनुमानय,  
 काँसि हुंद नु आँगरुन बाँगरुन जांह।  
 चेपि छुस सारिनय हुंज छस माये॥  
 कर्म लीखाये जय जयकार॥०॥

शुर्यन हुंज आँस्यनय हवॉल्यहथ पूर,  
 नरि जंगि थविनय बेयि अँछ पूर।  
 खँदमतस आँस्यनय च्वंजु तस दाये।  
 कर्म लीखाये जय जयकार॥०॥

प्यालु बरदौरी मे कॅरुन पूर,  
 प्रथ काँसि पलजान यछ करान पूर।  
 आँशनाव रुशनाव यिवान अँहुंजि माये॥  
 कर्म लीखाये जय जयकार॥०॥



‘सॉरिल’ छुय करान मनु किन्य ऑही,  
गछ दय थॅव्यूनय वॉसि रॉजी।  
इयकु बजि पॅत्यमि गरि कॅर्यनय साये॥  
कर्म लीखाये जय जयकार॥०॥



यारु म्यानि राजदानु राजदारो  
(मैत्रस पनुनिस)

सेदि बुथि रोजतम वारु कारो,  
यारु म्यानि राजदानु राजदारो।  
यारानु चोन छुम शेहजारो॥  
यारु म्यानि राजदानु राजदारो॥०॥

चुय छुख सीरु बोज जार बोजन,  
चॉन्य छम ब्रंजि ब्रंजि कल रोजन।  
अँछ लोसम करान इंतिजारो॥

यारु म्यानि राजदानु राजदारो॥०॥

योदवय खोरस कौड़ अचिय जांह,  
अँछिर वालव कड़य ताब यियि मा।  
यितु यूर्य वनुहय हालिजारो॥  
यारु म्यानि राजदानु राजदारो॥०॥

रॉचन द्वहन ऑस्य् नु ब्योन रोजन,  
बोजु नावान पनुन तु चोन बोजन।

बोस ओस ल्वतान लोलु गुफ्तारो॥

यारु म्यानि राजदानु राजदारो॥०॥

कृष्णस सुदामा मोठ मा जांह,

लोगुन मसॉ जांह लापरवाह।

कोरनस अथुरोट, ओस लाचारो॥

यारु म्यानि राजदानु राजदारो॥०॥

अँछ यिनु फेरुनय दिल हँन्दर्यम,

कल मँशरावख मन छँदर्यम।

यिना मनुसावख दोस दारो॥

यारु म्यानि राजदानु राजदारो॥०॥

अख अँकिस अथुरोट यारज गँय,

ख्वदगर्जी बँड लानथ छय।

कम पायिय छु पोज गमखारो॥

यारु म्यानि राजदानु राजदारो॥०॥

स्वख चोन डीशिथ छेनु यिवान पछ,

नजरि बद दूर गँछ्यनय रछ रछ।

श्वदि ब्वदि छावतो सबजारो॥

यारु म्यानि राजदानु राजदारो॥०॥

यिनु जांह त्रावुहम वाँलिज छैन्य्म,

कँन्य् आलुविथ छनख कँटुय छैन्य्म।

लोलु अँशसुय लग्य्म दारु दारो॥

यारु म्यानि राजदानु राजदारो॥०॥



रुमु रेशुनुय आय चैय लॅग्यनय,  
व्याँज पोत हैयनय जुब बॅचनय।  
छूयोऽट अन्न कर तर्क परहेजगारो॥  
यारु म्यानि राजदानु राजदारो॥०॥

चानि वेरि शारिकायि करु बु ज़ोरी।

स्वय करी योरी कासि खोरी।

‘साँयिल’ करस सख ज़ारु पारो॥

यारु म्यानि राजदानु राजदारो॥०॥



ग्वरु दीवु बु क्याह नज़रानु दिमय

(ग्वरु दीवस धन्य धन्य)

अनु कति स्व ज्य्व शुक्रानु करय,

ग्वरु दीवु बु क्याह नज़रानु दिमय।

छुस दैरिथ बु चानी आसरय॥

ग्वरु दीवु बु क्याह नज़रानु दिमय॥०॥

नेत्रन अंदर शीरिथ बु थवथ,

मनु मंदुरस मंज पुरिथ थवथ।

म्वनि फॅल्य् पनुन्य् दुर्दानु जरय॥

ग्वरु दीवु बु क्याह नज़रानु दिमय॥०॥

चै नु कुनिची कॅमी मे नु किंही ति छुम,

चै निश मा कॅह खॅटिथ यिय मे खोऽटुम।

चे निश बॅल्य शान थवन्य वनतु मा सरय ॥

ग्वरु दीवु बु क्याह नज़रानु दिमय ॥० ॥

अँन्य सारि वतु पँद्य कति छारुहा,

ग्वरु शब्द चोन नय गारुहा।

आछुर चु अबुसान पनुनि वरय ॥

ग्वरु दीवु बु क्याह नज़रानु दिमय ॥० ॥

वथ नय हावख तु लवु क्याह बो,

छांफ नय कासख लबु क्याह बो।

यिय बु छुस तिय छुस चानि दरय ॥

ग्वरु दीवु बु क्याह नज़रानु दिमय ॥० ॥

दुयि हुंद गोट छुम रावुरावान,

अख द्रयतु बाव छुम आवुरावान।

मुछराव अडु भवु सेंदि बो तरस ॥

ग्वरु दीवु बु क्याह नज़रानु दिमय ॥० ॥

सन्युच्यथ मे क्याह अर्पण सु करय,

जुव छुम तु सुय च़ेय आलुवय।

तथ रछनु ज़ांह कांह वायि बरय ॥

ग्वरु दीवु बु क्याह नज़रानु दिमय ॥० ॥

पादन बु च़ेय रतु छेपि लगुयो,

सोरुय च़े व्योद छुय तु क्याह मंगुयो।

इखिचानि रोस किथु कँन्य दरय ॥

ग्वरु दीवु बु क्याह नज़रानु दिमय ॥० ॥



ओंही

तन मन तु धन सोरुय वंदय,  
 गँजरावतम मे पनुनुय बन्दय।  
 सुमरन करय चॉन्य् क्षनु क्षनय॥  
 ग्वरु दीवु बु क्याह नज़रानु दिमय॥०॥  
 छुम म्वहरु गंज अनुग्रेह मे चोन,  
 चे ह्युव दौयुम कुस यार म्योन।  
 ‘साँयिल’ बु न्यथ त्वता करय॥  
 ग्वरु दीवु बु क्याह नज़रानु दिमय॥०॥



## मॉफी दिज़्यम (लेखकु सुंज नदामथ)

मॉफी दिज़्यम, मॉफी दिज़्यम,  
 मॉज म्यॉन्य् शिकमस मंज रोछथस,  
 नवन र्यतन पोलथस ललुनोवथस।  
 पतु गुसु मुत्रु कोडथस बोड कोरथस,  
 वॉलिंजि हुंज वस चावुनोवथस।  
 म्यानि रंगु व्यतुरिथ कम सितम॥  
 मॉफी दिज़्यम, मॉफी दिज़्यम॥०॥

म्यानि बबु कोठ कम्बर मिलनोवुथ,  
 म्योन पालुन तु प्यतरुन पूर कोरुथ।

राथ द्रह कुन कोरुथ म्योन सौरुथ,  
 ज़ांह म्योन बद रद मा च़े ज़ोरुथ।  
 ख्यन चन पलव प्वशाख मील कलम॥  
 वॉफिर मै थॉवथम, प्रथ कांह हन॥  
 मॉफी दिज़्यम, मॉफी दिज़्यम॥०॥

हे म्यानि बबु! हय मॉज म्यांन्यु,  
 छिम ग्रॅन्ज़ रॅस्यती र्यन मे चॉन्य।  
 तुहुंदुय मे रछ् रछ् दॉन्यु दॉन्यु,  
 रथ माज़ वॉदुवम ज़ॉन्यु ज़ॉन्यु।  
 सीवा कॅरमव नु शर्मन्दुगी छम॥  
 मॉफी दिज़्यम, मॉफी दिज़्यम॥०॥

म्यान्यव बुज़र्गव तय बन्धव,  
 मामव, मामुन्यव, मासव प्वफव।  
 पेंतरव तु पेंचन्यव, नानिबुड्यबबव,  
 बायव, बैन्यव टाट्यव पनुन्यव।  
 स्वय रछन दग वुनि च्यतुसुय मे छम॥  
 मॉफी दिज़्यम, मॉफी दिज़्यम॥०॥

म्यान्यव चुक्यदारव पोलुवस,  
 ललु नोनवस सुलुनोवुवस।  
 असुनोवुवस गिंदुनोववस।  
 हैछि नोवुवस संबलोवुवस।  
 छांयन तु ग्रायन मैय वुछिहम॥  
 मॉफी दिज़्यम, मॉफी दिज़्यम॥०॥



सडकव मे कॅरमवु मांड़ बस,  
 वतुनुय मे कॅरमवु चांड़ बस।  
 नागव कवलव सगुनोव हस,  
 पवनस तु अँगनस तुल मे रस।  
 मेच जन्म भूमि, बुतुराथ छम॥  
 माँफी दिज्यम, माँफी दिज्यम॥०॥

कोर्यव तु गोबरव सीवा कॅरुम,  
 अर्धांगनी स्वख मेय द्युतम।  
 विजि विजि मे न्वशिवुय राहथ द्युतुम,  
 सातु सातु पुछ हम तु गोरु हम।  
 आँशनावव दाय मशवरु द्युतुवम॥  
 माँफी दिज्यम, माँफी दिज्यम॥०॥

पनुन्यव रॅफीकव तय हेत्यव,  
 पनुन्यव गवरव वतु हावुख्यव।  
 यारव तु मैत्रव तय रुत्यव,  
 हमसायव लूक्यव तय बडयव।  
 दिचुवम मे दाय तय माय बॅरुवम।  
 माँफी दिज्यम, माँफी दिज्यम॥०॥

म्याानि दॅस्य ह्योकुवु नु कांह स्वख लॅबिथ,  
 म हेचमवनु कांह सीवा कॅरिथ।  
 छेनि अथु नु कांह मुरुवथ कॅरिथ,  
 कुनि कसमु नु कांह अथुरोट कॅरिथ।  
 'सॉयिलस' नदामथ अमिची छम॥  
 माँफी दिज्यम, माँफी दिज्यम॥०॥



## सॉन्य् सिन्य

लॉग्य् र्वंग क्याह क्वंगु तरकारे लो

अनि पदारेंच तु रनि वारि वारे लो,

लॉग्य् र्वंग क्याह क्वंग तरकारे लो।

चारि सब्जीयि ओक ओक वारे लो॥

लॉग्य् र्वंग क्याह क्वंगु तरकारे लो॥०॥

ताजु सब्जी सारि अटुबारे लो,

व्वस्तुकारव आयि कतरावे लो।

क्रायि पाकस लाजख सारे लो॥

लॉग्य् र्वंग क्याह क्वंगु तरकारे लो॥०॥

नदुर्य यखन्या अलु यखन्या छि मजुदार,

दमु ओलुवन छि नेरान मुशकुन्य दार।

कॅलियि चामन छे मन करान तारे लो॥

लॉग्य् र्वंग क्याह क्वंगु तरकारे लो॥०॥

चौक्य् वांगन तु राजुमह रनि बिसियार,

फूल गूपियव बंदगूपियव द्युत जहार।

मटर पालक खे ह्यडरन प्रारे लो॥

लॉग्य् र्वंग क्याह क्वंगु तरकारे लो॥०॥

छिय प्वलावस पंज म्यवु क्याह कुसुमवार,

मुशकि अटुफर छु नेरान ज़न फम्वार।

शुफतु चेरु छय मोदरि मेछि सारे लो॥

लॉग्य् र्वंग क्याह क्वंगु तरकारे लो॥०॥



खुंबु ह्यडुरन क्याह कोरुख मशरूम नाव,  
मर्चु पपरन छी अनान क्रायि मंजु ताव।  
गुल मरगि हंजु ताजु मॉश क्रांरे लो॥  
लॉग्य् र्वंग क्याह क्वंगु तरकारे लो॥०॥

वुछ तु चालि कमि म्वंजि आंचार शूबान,  
मुजि चेटिनि कुन वुछिथुय दिल छु लुबान।  
द्वद प्यालन द्वद क्याह क्रांरे लो॥

लॉग्य् र्वंग क्याह क्वंगु तरकारे लो॥०॥

द्वद लॉगिथ कनु गुछिनुय छे मंगमंग,  
वछतु मरचुवांगन पकोर्यन क्याह रंग।  
पुदनु चेटिनि रायता कुसनु सारे लो॥  
लॉग्य् र्वंग क्याह क्वंगु तरकारे लो॥०॥

वुछ थपल बतस क्याह थपल दोरान,  
खेयि यानु खेयि कुस छु कस किन्य् हॉरान।  
कुस सॉ लॉजिम दारन प्रारे लो॥

लॉग्य् र्वंग क्याह क्वंगु तरकारे लो॥०॥

ह्यम्बु तय छिटि राजुमाह मॅशरॉवी,  
वोन तिमुनय फॅली तय अंडा फॅली।  
असल तीलु बदलु धारा दारे लो॥  
लॉग्य् र्वंग क्याह क्वंगु तरकारे लो॥०॥

गॅयि आजरथ माजरथ तु पॅछू पूजाह,  
चेटि बतुसुय थपुथफ हय तोबाह।

नरि नेबोखुय युस नु यियि वारे लो॥

लॉग्य् र्वंग क्याह क्वंगु तरकारे लो॥०॥

फिश कटल्यट आम गॅयि फ्रायड क्वकर,

रलु प्रभातु छी माद तय नर।

वन गॅरीब व्वन्य् किथु संदारे लो॥

लॉग्य् र्वंग क्याह क्वंगु तरकारे लो॥०॥

छुय “सायिल” गुल्य् गँडिथ करान अर्जीह,

रॅछरॉविथ थॅव्युतो न परम्परा।

नतु सब तु रब गछि क्याह व्यचारे लो,

लॉग्य् र्वंग क्याह क्वंगु तरकारे लो॥

बिगरेमतिस पतु कुस सुधारे लो।

लॉग्य् र्वंग क्याह क्वंगु तरकारे लो॥०॥



लॉज हय मैकसी अमि राज़ु बाये।

(हज़ुल)

वुछतु खुलडुल मारन ग्राये,

लॉज हय मैकसी अमि राज़ु बाये।

दॅछिन्य् खोवर्य छेनु बरान वाये॥

लॉज हय मैकसी अमि राज़ु बाये॥०॥

राश लोबमुत ज़न छुन काडमुत काड,

दूरि बासान दॅरज़ु पॉथरुकज़न बांड।



पान ललुवान पकान आयि आये॥

लॉज हय मैकसी अमि राजु बाये॥०॥

जोरु तुलिहे कदम छुसनु तथ कांहवार,  
वैटिथ थोवमुत ग्वडव ब्वन वस्यस येजार।

फॉशन करान रूजुस नु राये॥

लॉज हय मैकसी अमि राजु बाये॥०॥

द्वहस रातस येलि वुछुन फिलमी नाच,  
पलि मा प्योस केह डानसुक हाच पाच।

रॅव्यु तय वचन मशि लीलाये॥

लॉज हय मैकसी अमि राजु बाये॥०॥

जॉल्यु गर्मन पलुवुय छिनु चालन,

कति फयरन पॉछ्य दोति कति।

खासु मल मल ग्वबान गर्मु क्राये॥

लॉज हय मैकसी अमि राजु बाये॥०॥

हू हू तय हाहा प्रथ तर्फन,

गव पावर हसरुय छुन वावुजन।

आयि मैकसी बारुसस किठ नॅन्यु द्राये॥

लॉज हय मैकसी अमि राजु बाये॥०॥



# यसलु गॅयि मैकसी आम लोलो

यसलु गॅयि मैकसी आम लोले,  
हश तु न्वश छस हिशी ज़ाम लोलो।  
शर्मदोरी यिहय पाम लोलो॥

यसलु गॅयि मैकसी आम लोलो॥०॥

तनि तनि मैकसी लॉगिथ छय,  
गूर्य बायि बुहूर्य बायि पॉछ्य लॉगिथ छय।  
पॉजामु नॅर्य छि दुम दाम लोलो॥  
यसलु गॅयि मैकसी आम लोलो॥०॥

बाज़ुरन फेरान दॅरज ज़न छय,

रु रु करान यिमु नेरान छय।

नॉली थवान सुबु शाम लोलो॥

यसलु गॅयि मैकसी आम लोलो॥०॥

अख नोर वेरनागु ब्याख अछिवल,  
हेरि ब्वनु यिवान सोरुय नज़रि तल।  
कौमस करान बदनाम लोलो॥

यसलु गॅयि मैकसी आम लोलो॥०॥

हयहस तु शूबि शर्मि थॉविख तॉर्य,

बस रूद्य फारिन फॉशनन लॉर्य।

धर्मस कोरुख लीलाम लोलो॥

यसलु गॅयि मैकसी आम लोलो॥०॥



माय तय म्वहबत रूशिथ चोल  
 न्वशि बोर भरथहस पिह्य पिह्य फोल।  
 जित्य कँडिख बुथ्य कँरिख त्राम लोलो॥  
 यसलु गँयि मैकसी आम लोलो॥०॥

गर्म गव पोजुय, पज्या पर्दु त्रावुन,  
 रोत ड्रस द्वहलि छा रवा लागुन।  
 ब्वाय कट करान बँड्य नाम लोलो॥  
 यसलु गँयि मैकसी आम लोलो॥०॥

बानुहालि गलि यपोर याम अँस्य आय,  
 हँदरेयि दिल मोठ म्वहबथ तु माय।  
 प्वखतु आँसिथ द्रायि खाम लोलो॥  
 यसलु गँयि मैकसी आम लोलो॥०॥

हवुहुय बटुल्योव पॉर्यजान रॉव,  
 रिशतय चँट्य आँशनाव मनुसाँव्य।  
 गँयि ब्योन ब्यनथुर तु माम लोलो॥  
 यसलु गँयि मैकसी आम लोलो॥०॥

अँस्य् मा जांह सनान पजुनस हे,  
 पथ गछव नु रोजुन्य् वर वचुनस हे।  
 नकलस कुन गंडान लाम लोलो॥  
 यसलु गँयि मैकसी आम लोलो॥०॥

बुर्बीदी हुंघ छी यिमय केरन,  
 मर्द तन वलान जमि नंगु ननि नेराने।



काँशुर कौरख बस राम लोलो॥

यसलु गँयि मैकसी आम लोलो॥०॥

“साँयिलो” यिम कमू फॉशन आय,

काँशुर त्रोव ह्योछ ‘वव’ तय हाई।

बर मंदिन्यून यि छु शाम लोलो॥

यसलु गँयि मैकसी आम लोलो॥०॥



अडवर बुडव लॉग्य् किठ वेसिये

(हज़ुल)

समुयन क्याह नियि हिट वेसिये,

अडवर बुडव लॉग्य् किठ वेसिये।

अँध्य् वनान आसुन विट वेसिये॥

अडवर बुडव लॉग्य् किठ वेसिये॥०॥

प्वलुरिस मोटिस ग्रवज़ु अलु अलु करान,

जाँविल्यून नरकाँन्य् नँल्यचि ज़न अलाम।

किठ कम्बर गँडिथ छिय फिट वेसिये॥

अडवर बुडव लॉग्य् किठ वेसिये॥०॥

कम कम डिज़ाइन यिमान किठनुय आय,

अँड्य छि खँल्य् अँड्य तंग प्यठ गर्मु क्रॉय।

छिनु यचान लॉगिथ छिठ वेसिये॥

अडवर बुडव लॉग्य् किठ वेसिये॥०॥



कोर्यन न्वशान मंज छायि शायान,  
 यिमव ख्वतु न्यंदर्यन हंजु काठि जान।  
 युसनु लागि सुय छु अनफिट वैसिये॥  
 अडवर बुडव लॉग्य किठ वैसिये॥०॥

यथ तथ अँस्य करान नकुल वुछिनय,  
 गुजिर्य इस खान इस लोग सनुनय।  
 रोट फराह दिच असलस हिट वैसिय॥  
 अडवर बुडव लॉग्य किठ वैसिये॥०॥

गरि नीरिथ असि क्याह क्याह नु प्रोव,  
 यिय ओस जॉपितु ती मँशरोव।  
 पानुवॉनी कँरय रिट वैसिये॥  
 अडवर बुडव लॉग्य किठ वैसिये॥०॥

मुलु तलु कुर्तु पॉजामु गव द्रोग,  
 पगोन पतलून चोट किठ गव श्रोग।  
 तँथ्यु वोन किठ छु व्यल निट वैसिये॥  
 अडवर बुडव लॉग्य किठ वैसिये॥०॥

यसनु म्वखु नेरान किठ शूबान,  
 नहकु तस ब्यडोलस दिल छु लूबान।  
 कुंस कूर ह्यडान न्वश ज़िठ वैसिये॥  
 अडवर बुडव लॉग्य किठ वैसिये॥०॥

बेकार मर्दन त्रे कार मटि वाह्य,  
 गरिक्यून बॉचन तिम तुलान न्याय।

हुति येति लॉजिख तासु बिठ वेसिये॥

अडवर बुडव लॉग्य किठ वेसिये॥०॥

तुरुबलु बॅर्य मछि गंड, अँक्य किठु चंदस,

जंगु आसि रसु बरनु रूदस नु ह्यस।

शुर्यव तुल फोदि वाह वाह छिट वेसिये॥

अडवर बुडव लॉग्य किठ वेसिये॥०॥

“सॉरिलो” सादु मनोशो हो,

ह्यडनय हो गछु ल्वति बेहतो।

दपन ही इज अन फिट वेसिये॥

अडवर बुडव लॉग्य किठ वेसिये॥०॥



## मस छुवु बोड वस

माजव बेन्यव ज्वहदथ हॉव्य तव,

मस छुवु बोड वस रँछरॉव्य तव

रछि कॅर्यतोस तय संबु

मस छुवु बोड वस रँछरॉव्य तव॥

रँछरॉव्य तव तलय रँछरॉव्य तव।

मस छुवु बोड वस रँछरॉव्य तव॥०॥

यि हय छुवु शूभ तय ज़रु ज़ेवर,

तुहुंजुय स्वंदरता तुहुंदुय कदुर।



फवलवुन तीज पनुन फोलरॉव्य तव,  
मस छुवु बोड वस रँछुरॉव्य तव॥

रँछुरॉव्य तव तलय रँछुरॉव्य तव।

मस छुवु बोड वस रँछुरॉव्य तव॥०॥

मस चँट ऑसिन मानान मनहूस,  
टोप कासुन ओस व्वहव तय दूश।  
कथ छुवु सिरु कथ पलि पॉव्यतव,  
मस छुवु बोड वस रँछुरॉव्य तव॥

रँछुरॉव्य तव तलय रँछुरॉव्य तव।

मस छुवु बोड वस रँछुरॉव्य तव॥०॥

मस छुय महिलायि दयि सुंद द्युत,  
य्वहय छुस रुचर तय यी छुस रुत।  
मातृ शक्ती हुंज शान थाव्य तव,  
मस छुवु बोड वस रँछुरॉव्य तव॥

रँछुरॉव्य तव तलय रँछुरॉव्य तव।

मस छुवु बोड वस रँछुरॉव्य तव॥०॥

अमि वरॉय कथ कँरिव साज तु सिंगार,  
शम्पू तु माँजि हुंद व्वन्य बड्योवु कार।  
पँरफ्यूम रौस कार पकूनॉव्यतव,  
मस छुवु बोड वस रँछुरॉव्य तव॥

रँछुरॉव्य तव तलय रँछुरॉव्य तव।

मस छुवु बोड वस रँछुरॉव्य तव॥०॥

सान्यून दीवियन मस छु प्रज़लान,  
 नॉर्यवन आसुवु अँथ्य् खारान।  
 तोह्य ति छवु दीवियय मानुथॉव्य्तव,  
 मस छुवु बोड वस रँछुरॉव्य् तव॥

रँछुरॉव्य तव तलय रँछुरॉव्य् तव।

मस छुवु बोड वस रँछुरॉव्य् तव॥०॥

गुल्य् गँडिथ छु “**सॉयिल**” करान व्यनती,  
 मँशरॉविव मु धर्मच प्रती।

छैटि तु श्रीचिच फख्र मु मँशरॉव्य्तव,  
 मस छुवु बोड वस रँछुरॉव्य् तव॥

रँछुरॉव्य तव तलय रँछुरॉव्य् तव।

मस छुवु बोड वस रँछुरॉव्य् तव॥०॥





# नमून बापथ काँशिर्य पाँठ्य सालु चिठि (नैचिव्य खांदर)

(1)

म्यानि यज़थमंद बांधवुँ ! .....

इष्टदीवी शारिकायि हुंदि अनुग्रेह तु सेद्धि दाता महा  
गणपतु सुंजि यछायि किन्ऱु सपुद

सत्येन्द्र जियस	सत्य भामा जियि
(श्रीमती तु श्री रविन्द्र कौल	(श्रीमती त श्री रमण दर
सुंदिस साह्यबज़ादस)	•सुंजि साह्यब ज़ाज़ि)

सुत्य श्वब व्यवाह स्यद।

अवय किन्ऱु छि त्वहि गुल्य गॅन्डिथ व्यनती जि  
पंदोह्यमि अप्रेल, 2004 ई. वहिकु गटुपॅछ चोरुम, ब्वदवारि  
द्रह बहि बजि काँजिस यियिव पनुन परिवार ह्यथ सानि  
सालु साँनिस गॅरीब खानस प्यठ तु कॅरिव सोन दार पवित्र।  
सुतिय कॅरिव अथ नवि जोरि आँही। अँस्य रोजव तुहंजु वतु  
वुछान। बैयि रूज़िव प्रोग्रामु मूजूब अथ श्वब कार्ययस मंज  
लोलु सान असि सुत्य बराबर शाँमिल।

तुहंदिस स्वागतस आसन  
कमलावँती तु कमल जी कौल  
वुकँदल श्री नगरुक्य,  
वुन्यक्यन 113—सर्वाल, जोमि।

## कमि द्वहें क्याह छु

गरुनावय ओकद्वह — 10 अप्रेल 2004 — शुक्रवार  
 माँजि राथ द्वय — 13 — अप्रेल 2004 — चेंद्रवार  
 दिवु गोन त्रय — 14 — अप्रेल — 2004 — बोंमवार  
 लगुन तु बराथ चोरम—15 — अप्रेल — 2004 — ब्वदवार  
 साल पॉन्चम—16 — अप्रेल — 2004 — ब्रसवार  
 (व्यनती छे जि बराँच सुत्य गछनु खॉतरु यियिव 15 —  
 अप्रेल ब्वदवारि द्वह सुबहस पूरि 8-00 आँठि बजि)

(2)

(कोरि खांदरस प्यठ)

सेदि दाता महा गणोशि सुंजि दयायि सुत्य वरि

शकुन्तला

रमेश

(श्रीमती महा लक्ष्मी तु

(श्रीमती प्रभाजी तु श्री प्रेम नाथ

श्री अर्जन नाथ दर

सुंदिस सुपुत्रस)

सुंजि कन्यायि)

जियस 12 अगसत 2001 ई., कार्तिक जूनु पछ  
 शेयिम — शुक्रवारि द्वह।

त्वहि छि गुल्य गॅन्डिथ व्यनती जि मुकरु द्वहें वॉतिव  
 परिवारु सान सुबस नवि बजि सोन गरु तु कॅरिव महाराजु  
 मदनस तु बरात्यून हुंद स्वागत। अथ नवि जोरि कॅरिव  
 पोशि पूजा तु कॉन्छूख ओर जुव तु दोर कोठ, स्वख तु



सावय, बेयि थोद आय तु थदन पाय। येनिवाँल्य सब  
होरनु पतु कँरिव तोह्य ति असिय सुत्य अत्र तु बँडरॉविव  
सॉन्य शान। बाक्य द्वहन ति रूजिव कार्यक्रम मूजूब असि  
सुत्य अथवास करान। असि छे आश तु तोह्य रँछज्योन।

स्वागत करन वाँल्य

श्याम रॉनी तु श्याम लाल दर

सॉरी बन्ध बान्धव

108 पंज तीरथी, जम्मू।

### कार्य — क्रम

गरुनावय	ओकद्वह — 6—अगस्त 2004 — चँन्द्रवार
सातु मॉन्ज	त्रय — 8— अगस्त 2004 — ब्वदवार
मॉन्जि राथ	चोरम— 11— अगस्त — 2004 — ग्वरुवार
दिवु गोन	पॉन्चम — 11— अगस्त — 2004 — ग्वरुवार
लँगुन	शेयम — 12— अगस्त — 2004 — शुक्रवार
सतुराथ	शेयम — 12— अगस्त — 2004 — शुक्रवार

(3)

(मेखलायि प्यठ)

ऊँ भूभर्वःस्वः तत्सवितुर्वरेन्यम भरगो देवस्य  
धीमहि दियो योनः प्रचोदयात्।

श्रीमाण / श्रीमति

राम नाथ राजदान / रमसभाभी राजदान

बटु तीज नँविन तु बटु फोलिन! सान्यन यिमन

ओंही

लाल फल्यून हुंज (यज्ञो पवीत संस्कार) मेखला दिन्य  
सपुद माता सरस्वति तु माता इन्द्रक्षी हुंजि यछायि तु दयायि  
किन्य स्यद। यिम लाल फॅल्यु छि :

सुमन

(सोम नाथ भान तु सोमावॅती हुंद सुपुत्र)

रविन्द्र

(अशोक भान तु लॅक्ष्मीजी हुंद सुपुत्र)

श्रवण

(भूषण लाल भान तु आशजियि हुंद सुपुत्र)

मेखला यियि 5 अक्तूबर 2004 कार्तिक जूनु पॅछ  
सतुम, ब्वदवारि द्वहॅ पनुनी गरि दिनु। त्वहि छे व्यनती जि  
सानि धर्मुच यि मॅर्ययादा तु रीती बराबर पकनाव नु खॉतरु  
तु पनुन बाँय बन्दुत रॅछरावनु खॉतरु यियिव तोह्य अमि द्वहॅ  
सोन गरु। शामन कॅरिव नॅवीद ति तु अथि फोल ति रॅटिव।  
अॅस्य रोजव तुहुंदिस दर्शनकिस इंतिजारस। यिनु न्यराश  
कॅरिव। पनुन सोरुय परिवार अॅन्यज्योन सुत्य।

स्वागतस

प्रभावती तु पृथ्वी नाथ भान

साँरी बंद तु बांधव

कनि कदल, हबुकदल, श्रीनगर,

बुन्यक्यन—202, रूपनगर, 3 सेकटर

जम्मू तवी।



आँही

कमि द्वहँ क्याह छु ?

गर नावय बटुवार—1—अक्तूबर 2004—

कार्तिक जूनु पछ —त्रय

माँजि राथ चँन्द्रवार—3—अक्तूबर 2004—

कार्तिक जूनु पछ—पौन्यम

दिव गोन बवोमवार—4—अक्तूबर 2004—

कार्तिक जूनु पछ—शेयम

क्वषल हुम ब्रसवार—6—अक्तूबर 2001—

कार्तिक जूनु पछ — आँठम

स्वख तय आनन्द कर्मस खोतये,  
माजि भवाणि श्वबु फल द्युतये चैय।  
इयकुन तीज नीर्यनय फ्रूच तय ह्योतये,  
आँशवी वादि यि “सायिलन” द्युतये चैय॥

(4)

(कोरि खांदरस शूर्यन हुंजि मेखलायि प्यठ)

आँही

यि बुलबुल जूरय मोदुर बोल बोश करुवुन्य,  
दया भगवान बबु सुंज पूशिन वाँसि द्वशवुन्य।

थ्यकुन रूजिन यिहुंद अथुवास मिलचार॥

दियिन मीठय पादुनय स्वख वुम्बरि द्वशवुन्य॥०॥

टाठ्यव बंदव तु बांधुवव!

त्वहि सपदि हर्ष जि भगवान बबु सुंजि

दयायि सुत्य वरि

सीता

रामचंद्रस

सुपुत्री.....तु सुपुत्र.....तु

श्री..... श्री.....

ब्वदवार ऑशदु जूनु पछ चोरम(...अक्टूबर... 2005) सुबहन 8 बजि। त्वहि छे व्यनती जि तोह्य कॅरिव सोन द्वार पवित्र तु शाहस तु बरॉच हुंद स्वागत कॅरिथ कॅरिथ अथ असुवुनि जोरि पोशि पूजा। यि व्वछुब सपदि “शारिका आंगन” आज़ाद कालोनी मुठी पलोराटाप, किस शांदार यहातस मंज। माँजिराथ तु दीवुगोन ति सपदि अतिय, भोमवार, ऑशदु जूनु पछ त्रैयि द्वह, (21 अक्टूबर 2005)।

बराथ नखु वॉलिथ कॅर्यज्यव असिय सुत्य् प्रेयमु बूजन। सुती सपदि आथवार ऑशदु जूनु पछ ऑठम (26 अक्टूबर 2005) शारिका आंगनसुय मंजः—

..... तु .....

(सुपुत्र.....)

(सुपुत्र.....)

हुंजि श्वब मेखलायि हुंद संस्कार। त्वहि छे व्यनती जि व्वछुबु कि प्रोग्रामु मूजूब अँनिव तोह्य सारिनुय प्रूगन मंज शिरकत तु मेखलायि द्वह ति कॅरिव शामन



नँवीद असिय सृत्य। बांद बांद छुवुः—

स्वागतस आसन

दर्शन अभिलॉषी

(5)

(काह नेथरस/ज़रुकासयि प्यठ न्यमन्त्रण)

तुहुंद मिलुचार छु असि पँज्य किन्यु गँनीमथ, .

तुहुंद सृत्य आसन हुरि असि शानु शवकत।

तुहुंद गछि सायि रोजुन तेलि फबव अँस्य॥

वुछान वतु तुहुंजु रोजव तुहुंज आँही छे दवलथ॥०॥

म्यानि टाठि/म्यॉन्य टाँठी

.....

जेठ जूनु पछि त्रेयि सुगव 30 अप्रेल 2002 ई.  
चँद्रवारि द्वह सपुद भगवान शंकरु सुंजि कृपायि किन्यु  
सॉनिस त्रेशि कुलिस ..... जियि सुंद शवब काहनेथर/  
ज़रुकास सँही। अथ शवब द्वहस प्यठ छु त्वहि म्योन  
बांद बांद जि तोह्य यियिव अमि द्वह सोन गरु कोज  
खेनि असि सृत्य। तुहुंदि यिनु श्रोचि सोन द्वार। बैयि  
हुरि तुहुंदि आँशीर्वादु सृत्य सॉनिस निकस लछि त्रोगुन  
आय तु लसन पाय बन्यस।

बु रोजु तुहुंजु वतु वुछान।

.....

## सालु काइन खांतर छोट्य चुपँद्य

(1) स्वख तय आनन्द कर्मस खातये,  
माजि भवाणि श्वभ फल द्युतये च़ेय।  
इयकुन तीज़ नीर्यनय फ़ूज तय ह्योतये॥  
आशीर्वाद “सायिलन” द्युतये च़ेय॥

(2) आशीर्वाद  
जा आजीवन तुम सुखी रहो!  
तेरी प्यार की जोड़ी सफल रहे!!  
सब सुविधाएँ तेरे पग चुमे!  
तेरा आनन्द मय परिवार रहे!!

(3)  
प्रेखटिनय, पँज़ नीर्यनय, गछ म्यॉन्य ऑही पूशिनय!  
म्यॉन्य रुम रुम छिय यछान, गछ जिंदगानी पूशिनय!!

(4)  
आशीर्वाद  
जा सुखी आनन्द सहित!  
“.....” “.....” के संग सहित!!  
पग चूमें समस्त सुविधाएँ!  
आजीवन हो तुम कष्ट रहित!!



(5)

स्वखु सान रूजिन आनंद छावान।

वाँसि अथवास करान॥

आँशन अरामन हुयनख आये।

फोलिन नँविन ती छुख 'साँयिल' मंगान॥

(6)

कर्मुन स्वख शुहुल छाव राजुबाँयी,

माजि भवाणि श्वभ श्वभ योछये यी।

फोल्नय इयकुन तीज ह्योत तु फ्रूजनीयनय,

'सायिलन' द्वछि द्वछि मोंगये यी॥

(7)

भेंट नहीं यह पुष्प अंजलि है।

मामता भरी माता की ओर से॥

आओ बेटी अपने द्वार में।

चटक रही सुख की कली है॥

(8)

वेद मातायि हृदि अनुग्रेह सुतिन,

यज्ञोपवीतस वोथयो दस।

सरस्वती यियियो जंगि वारुकारय,

गायत्री योनि स्वनु गोबरस॥

(9)

श्वब साथ वुछिनवु माजि सरस्वतिये,

स्वनु सुंद योनि आयिवु गायत्री ह्यथ।

ऊँ भू भुवः स्वः ग्वरु शब्द पॉल्य जे,  
धर्म पुछि पालुना कॅयज्यस न्यथ॥

(10)

नचिव्य् खांदरुक्यन सालु कार्डन खॉतरु  
ऊँ नमो भगवते गोपीनाथ।

ऑही

जूर्य “.....” तु “.....” हुंज छे खोबान,  
अंद वॉत्यनख अथुवास! नीर्यनख अरमान।  
आय हुर्यनख हनुवनु खांदानु सान,  
बाग फोल्यानख डखि छुख गुपु भगवान॥

(11)

स्वख तय आनन्द कर्मस खोतयो,  
माजि भवाणि श्वभ फल द्युतयो च़ेय।  
जूर्य चॉन्य् नीर्यनय फ्रूच तय होच़यो,  
ऑशीर्वाद यि “सॉयिलन” द्युतयो॥

(12)

गछ आय लॅग्यनव जिंदु रूजिव।  
जूर्य नॅव्यनव मुशिकनव वॉसि तोह्य बाग छॉविव॥

(13)

बुलबुल जोर्यन कॅर्यंजिरुत व्वपापय,  
फॉफलन, नवन, फवलन बॅर्यज्यख माय।  
अथुवास मूजूद रूज्यनख वॉसन,  
नीर्यनख हज हवस हुर्यनख आय।



“सॉयिल” इष्टदीवी यी छुय मंगान,  
महरर्न्यु महराज़न हुंज़ छस राय॥

(14)

आँही

म्याँन्य आँही यि छय गरुन तु कोर्यन दमु दमुय,  
जोरि नॅव्यनख, तीज़ हुर्यनख शॉद्य यियिनख दमु दमुय।  
बाग फोलनख तु गुल तु गुलज़ार हॉव्यनख लोलुक बहार,  
रुमु रेशुन आय, स्वख तु आनन्द पूशनख दमु दमुय॥

(15)

आँही

जोरि सानि रूज़्यतन अथुवास वाँसन,  
“.....” “.....तायि” मीट्य दियिन स्वख।  
“सॉयिल” छुय यछान यिहुंज़ शादमॉनी,  
डखि रूज़िनस शंकर तु हरम्बख॥

(16)

गछ आय लॅग्युनवु रुमु रेशुन लय जिंदु रूज़िव वाँसि तोह्य,  
जूर्य प्रेमच नॅव्युतनव छाव्युतव बहार वुम्बरि तोह्य॥  
रूज़्यनव अथवास मूजूद स्वख तु सावय आँस्यनव,  
मायि लोलस बेयि स्वखय रूज़िव करान बेयि लोजु तोह्य॥

(17)

ज़रुकासयि प्यठ

नॅविन मुशिकन फोलिन गुलज़ार युहुंदुय,  
कॉरिन भगवान बब बोड चारु युहुंदुय।

थ्यकुन रूजिन यिहुंद यखलास अथवास,  
कॅरिन तरकी तु पूशिन लोल युहुंदुय॥

(18)

गंडुनस या ज़र कासुयि तु गृहप्रवेशि वाल्यून  
कार्डन खॉतरु

हरि ऊँ तत्सत

ऊँ सदि दाता धर्म पुछि, स्योद तु श्रूच पोशि गोंद,  
अख अँकिस पिलुनॉविव,  
धनु द्यार बेयि दाजि सम्पदायि ख्वतन ति, वर्तीवुन्य्  
गछि पजि पँज माय।

व्यनु पोशिति तार लगि तु स्वनु पोशिति तार लगि,  
यिय सॉन्य् परम्परा छे हेछिनावान॥

येछि पछि लोलु मायि, ग्वरु ऑशीर्वादु बनि, श्वबु  
मिलुच्चारस पोशन पाय॥०॥

ऑही छि “सॉयिलुन्य्”, द्वशवुन्य् दर्यन गछि बबु  
भगवान करुन रुत व्यपाय,

असुवुनि गिंदुवुनि जोरि सानि क्युत कांछुन गछि सुय  
रुमु रेशुन आय॥

(19)

ज़रुकासुयि प्यठ

ज़रु कासनस छय डखि मॉज शारिका,

ज़रु कौसुनु चली प्रथ कांह ज़र।



रौछ करी ज़ाला, रौज़ा पानय,  
पोत ह्यनय द्वख तु व्याँज रोजी नु डर॥

(20)

गृहँ प्रवेशस प्यठ  
नवि लरि गृहँ प्रवेश यौछ महा गणेशन,  
प्रथ काँसि येछ्यतन युथ श्वब छन।  
त्वहि छुवु अथ प्यठ दार श्रूचरावुन,  
अँस्य् क्यथ अचव रोस बंदन बांधुवन॥

(21)

मेखलायन वाल्यून सालु कार्डन खौतरु  
हैंजे

दयि सुंदि अनुग्रेह .....स व्यूग वोथ,  
माज खौत फेकिनुय बंदन बांधुवन।  
येछि पछि निमन्त्रन त्वहि सूज आशि सोस,  
श्रूचरिव दार सोन छिवु अँस्य् प्रारान॥

(22)

हैंजे

माजि भवाणि वोल व्यूग रंजनोय,  
संज लोग व्यववाह कारस दयि यछाये।  
सोन दार श्रूचराँव्युतव तु सालस यीतव,  
लगि हुय्यर म्वहबतस तु बेयि माये॥

(23)

रुत शोगुन

स्वख तय आनन्द कर्मस खोतयो,  
माजि भवाणि शुभ फल द्युतयो चैय।  
जूर्य चॉन्प् नीर्यनय फ्रच तय हैचयो,  
ऑशीर्वाद यि 'सॉयिलन' द्युतयो चैय॥

(24)

हेंजे

माजि रॉगिन्यायि हुंदि अनुग्रेह दस वोथ,  
संज लोग अंशीशनिस व्यवहाकारस।  
स्वखु शेछ सालु शेछ सोजुनस साथ द्राव॥  
श्रूचुर्यज्यव दार खट्यन प्यठ व्वछबस॥

(25)

हेंजे

व्वछबस तु शादि लोग संज वारुकारय,  
फल द्राव श्वब यछाये अज।  
निमन्त्रन ..... हुंद कॅरिव सवीकारय,  
वेलु वो पोशि पूजाये अज॥

(26)

हेंजे ..... योछ बबुनुय श्वब धन,  
बंदन तु बांधुवन दपुने द्राय।



द्वार सोन श्रूचरिव शेछ छिवु सोज़न,  
पानुवॉन्प् बाँगरव लोल तय माय॥

(27)

हेंजे

दयि सुंदि अनुग्रेह व्यूग वोथ बारुन्यन,  
येंज़मन तु येंज़मनबायन बड्यव मान।

.....परिवारस छुय व्वछब तु शॉदी,

बंदन बांधुवन साल शेछ सोज़ान।

अँस्य करव यिम प्रूग यिकुवटु सॉरी,

तुहुंज़य वतु अँस्य् रोज़व तुछान।

सोन दार पवित्र गछि तुहुंदि यिनु किन्प्,

तुहंदे स्वागत खसि असि शान॥

व्यनती:— हेंजे या आँही लेखनस छु याद थवुन जि नमूनु  
चिह्यन मुताँबिक् लेखुन तु हेंजेहस तलुकनि गछि पनुनि जॉच  
हुंद नाव न्युकलेखुन। नाव ताँरीख गँयि पनुन्प् पनुन्प् लेखुन्प्।

## कृष्ण लीला

दर्शनु द्वख चॅल्य् त्रवबवनु लालय।  
पम्पोशि मालय त्रावय नॉल्य्॥०॥

दर्शनु द्वख चॅल्य् त्रवबुवनु लालय,  
पम्पोशि मालय त्रावय नॉल्य्।  
मनुचे भावुनायि रॅत्नदीप जालय॥  
पम्पोशि मालय त्रावय नॉल्य्॥०॥

दीवुकी हुंदि टाठि वासुदीवनि लालय,  
जसुदायि नंदु बाबन बॅरुय मालय।  
राधायि लोगनख शेरि गूपालय॥  
पम्पोशि मालय त्रावय नॉल्य्॥०॥

जगि हुंदि रक्षपालु कंसुनि कालय,  
जुलमुक येति तति गोलुथ न्यालय।  
भॅक्त्यन बूजुथ हालु अहंवालय॥  
पम्पोशि मालय त्रावय नॉल्य्॥०॥

बिंद्राबनुके कृष्ण गूपालय,  
कामुदीन म्वरली चै कन दारान।  
गूपियि छय बरान खिरु खंडु थालय॥  
पम्पोशि मालय त्रावय नॉल्य्॥०॥



राक्षसन गालुवुनि दीनु दयालय,  
 कम कम दुथ गॅयि प्राण हारान।  
 पूतनायि दामु अकि कोरुथ कुस हालय॥  
 पम्पोशि मालय त्रावय नॉल्य्॥०॥

टॉठिस 'स्वदामस' कोडुथ चैय मलालय,  
 पनु पारि कोरथस रंगु महलखान।  
 दरिद्र ऑसिथ सपुद ख्वशहालय॥  
 पम्पोशि मालय त्रावय नॉल्य्॥०॥

गीता ग्यवन वालि भक्ति रक्षपालय,  
 गीता अमर्यतुक कोरुथ संचार।  
 मालामाल कोरुथ भारत विशालय॥  
 पम्पोशि मालय त्रावय नॉल्य्॥०॥

रासाह गिंदुवुनि हा नन्दु लालय,  
 अर्जन दीवुने रथु बानय।  
 टोठ अज "सॉयिलस" बन तु कृपालय॥  
 पम्पोशि मालय त्रावय नॉल्य्॥०॥



## किताब कति कति मेलि

1. दिल्ली — 19-ए-महावीर जैन मार्ग, लक्ष्मी  
विहार-उत्तम नगर दिल्ली-59
2. जोम — 138/4/4 शारिका विहार रूप नगर जोम
3. कौल एन्ड सनुज़ जनरल स्टोर  
गली न०-2 पम्पोश कालोनी-जानीपुर
4. पुष्पति मंदिर-अपर लक्ष्मी नगर  
सरवाल, जोम



Gandhi Memorial College Of Education Bantalab Jammu



नाव	पी०एन० कौल
कलमी नाव	सायिल
पिता श्री	स्व० तारा चंद कौल
माता श्री	स्व० राधामाली कौल (रॉनिम द्यद)
अर्धांगनी	वीणा जी कौल ( क्षमा काज़ी)
असली रोज़न जाय	शालु कॅदुल हबुकॅदुल श्रीनगर, कशमीर
जेमिच रोज़न जाय	“शारिका आंगन” 138/4/4, शारिका विहार रूप नगर जोम
दिलि हुंज़ रोज़न जाय	“शारिका पीठ” 19-ए-महावीर जैन मार्ग, लक्ष्मी विहार- उत्तम नगर दिल्ली-59
ज़्युठ संतान तु तसुंज़ गुरुवाजेन्य	रविन्द्र कौल, ‘रविन्द्र’ रंजना कौल
कूंस संतान तु तसुंज़ गुरुवाजेन्य	सतीश कौल साधना कौल
शुर्यन हुंइ शुर्य	अम्बिका, नम्रता तु मनीश